



Univerzitet  
u Sarajevu

VODIČ ZA  
BUDUĆE  
STUDENTE  
UNIVERZITETA  
U SARAJEVU



Univerzitet  
u Sarajevu

**Izdavač:**

UNIVERZITET U SARAJEVU  
Obala Kulina bana 7/II  
Sarajevo

**Za izdavača:**

Prof. dr. Rifat Škrijelj, rektor

**Uređivački odbor:**

Prof. dr. Rifat Škrijelj, rektor  
Prof. dr. Aida Hodžić, prorektor  
Mr. sc. Alma Zolota  
Fuada Muslić, prof.

**Lektor:**

Tarik Ćušić, MA

**DTP:**

Karmel Sokanović

**Tiraž:**

1.000 primjeraka

**Štampa:**

“Štamparija FOJNICA” d. o.o. Fojnica



VODIČ ZA  
BUDUĆE  
STUDENTE  
UNIVERZITETA  
U SARAJEVU





# SADRŽAJ

Rifat Škrijelj 6  
Naj univerzitet 7  
Upis 8  
Međunarodna saradnja 11  
Podrška studentima sa posebnim potrebama 13  
Gdje stanovati 14  
JUKS Zavod za zdravstvenu zaštitu zdravlja studenata  
Univerziteta u Sarajevu 15  
Studentski parlament Univerziteta u Sarajevu

## **FAKULTETI I AKADEMIJE 17**

### **GRUPACIJA DRUŠTVENIH NAUKA**

Ekonomski fakultet 18  
Fakultet za kriminalistiku, kriminologiju i sigurnosne  
studije 20  
Fakultet političkih nauka 22  
Pravni fakultet 24  
Fakultet za upravu 26

### **GRUPACIJA MEDICINSKIH NAUKA**

Fakultet zdravstvenih studija 28  
Farmaceutski fakultet 30  
Medicinski fakultet 32  
Stomatološki fakultet 34  
Veterinarski fakultet 36

### **GRUPACIJA HUMANISTIČKIH NAUKA**

Fakultet islamskih nauka 38  
Fakultet sporta i tjelesnog odgoja 40  
Filozofski fakultet 42  
Katolički bogoslovni fakultet 44  
Pedagoški fakultet 46

### **GRUPACIJA TEHNIČKIH NAUKA**

Arhitektonski fakultet 48  
Elektrotehnički fakultet 50  
Fakultet za saobraćaj i komunikacije 52  
Građevinski fakultet 54  
Mašinski fakultet 56

### **GRUPACIJA PRIRODNO-MATEMATIČKIH I BIOTEHNIČKIH NAUKA**

Poljoprivredno-prehrambeni fakultet 58  
Prirodno-matematički fakultet 60  
Šumarski fakultet 62

### **GRUPACIJA UMJETNOSTI**

Akademija likovnih umjetnosti 64  
Akademija scenskih umjetnosti 66  
Muzička akademija 68

### **NAUČNI INSTITUTI 70**

Institut za istraživanje zločina protiv čovječnosti i  
međunarodnog prava 71  
Institut za historiju 72  
Orijentalni institut 73  
Institut za genetičko inženjerstvo  
i biotehnologiju 74  
Institut za jezik 75

### **UNIVERZITETSKI CENTRI, BIBLIOTEKE, DRUŠTVA 76**

Univerzitetski tele-informatički centar UTIC 77  
Centar za interdisciplinarne studije (CIS) 79  
Nacionalna i univerzitetska biblioteka BiH 80  
Gazi Husrev-begova biblioteka 81  
Akademska kulturni centar Univerziteta  
u Sarajevu (AKCUS) 82  
Univerzitetsko sportsko društvo "Bosna" 83  
**SLOBODNO VRIJEME 84**  
O Sarajevu 85  
Muzeji 88  
Društveni život 89

## Dobro došli na najstariji univerzitet u Bosni i Hercegovini!



Prof. dr. **Rifat Škrijelj**,  
rektor Univerziteta u Sarajevu

Kroz svoju dugogodišnju tradiciju Univerzitet u Sarajevu iškolovao je i društvu podario veliki broj eminentnih stručnjaka u gotovo svim oblastima kako na domaćoj tako i na međunarodnoj akademskoj sceni. Stoga držim da je naša opredijeljenost za produkciju savremenih i dinamičkih studijskih programa, koji su u skladu sa svjetskim standardima, naša dužnost i obaveza koja nema alternativu. Samo one zemlje koje su ulagale u obrazovanje svojih kreativnih ljudi danas se mogu pohvaliti visokim životnim standardom i konkurentnošću na tržištu.

Zato je naša osnovna misija i vizija stavljanje mladog čovjeka u fokus saznavanja i istraživanja koja će mu u sutrašnjici omogućiti da bude kompetentan odgovoriti na sve ljudske i akademske izazove koje pred njega stavlja budućnost. Uspjeh naših studenata u njihovom životu je mjera i našeg uspjeha, stoga se konstantno zalažemo za unapređenje i razvoj uvjeta studiranja koji ne zaostaju za vrhunskim evropskim principima stjecanja znanja.



Zato vas, dragi budući studenti, pozivam da odgovorno pristupite procesu obrazovanja i iskoristite prilike širokog spektra mogućnosti usvajanja znanja koje vam pruža naš univerzitet. Izborom Univerziteta u Sarajevu ne samo da postajete dio ponosne studentske i akademske zajednice koja broji više od 30.000 studenata već svoju intelektualnu radoznalost i naučnu spoznaju stavljate u funkciju liderstva za kojim vapi svako moderno i razvijeno društvo.

Budite sretni i ponosni što ćete postati dio Univerziteta u Sarajevu i svojim studiranjem doprinijeti razvoju naučne, stručne i etičke misli u našoj zemlji i šire.

Dobro došli!



Dragi budući studenti Univerziteta u Sarajevu, pred vama se nalazi vodič za buduće studente Univerziteta u Sarajevu u kojem su date opće informacije o studiju za koji ćete se opredijeliti i koji će predstavljati vaš novi iskorak u budućem napredovanju i razvoju. Zsigurno već znate da je naš ali i vaš Univerzitet u Sarajevu najstariji, najveći, najbolje rangiran, najprestižniji, najraznovrsniji i najbolji. Evo i zašto!

**NAJSTARIJI!** Osnovan je davne 1949. godine, što predstavlja svjedočanstvo općeg društvenog i kulturnog razvoja Bosne i Hercegovine. Ujedno slijedi i evropsku humanističku tradiciju humboldtovskog univerziteta, neprekidno se brinući o povezivanju istraživanja i obrazovanja i na taj način jača i oplemenjuje bosanskohercegovačku akademsku zajednicu. Univerzitet u Sarajevu je i pokretač osnivanja novih univerziteta: u Mostaru, Banjoj Luci i Tuzli, te predstavlja alma mater svih javnih univerziteta u Bosni i Hercegovini.

**NAJVEĆI!** Pod okriljem Univerziteta u Sarajevu nalazi se 25 fakulteta i akademija, kao punopravnih članica Univerziteta, pet instituta, tri univerzitetska centra, pet pridruženih članica, te pet ostalih članica.

**NAJBOLJE RANGIRAN!** Na svim rang-listama na kojima je Sarajevski univerzitet rangiran nalazi se na prvom mjestu kada je Bosna i Hercegovina u pitanju. Na Webometricsovoj listi Univerzitet se nalazi u prvih 8% svih rangiranih univerziteta u svijetu.

**NAJPRESTIŽNIJI!** Na Univerzitetu u Sarajevu trenutno studira oko 31.000 studenata. Od osnivanja do danas studij je završilo preko 160.000 diplomanata, preko 16.000 magistranata i preko 3.000 doktora nauka. Univerzitet u Sarajevu posjeduje institucionalnu akreditaciju, kao i međunarodnu akreditaciju određenih studijskih programa koji se izvode na

fakultetima i akademijama Univerziteta u Sarajevu. Na Univerzitetu predaje 40% svih nastavnika u Federaciji Bosne i Hercegovine. Na našem univerzitetu studiraju strani studenti koji dolaze iz zemalja okruženja ali i iz SAD-a, Italije, Brazila, Kenije, Sirije i mnogih drugih, njih oko 1000. Na međunarodnom nivou Univerzitet u Sarajevu ima 158 sporazuma o saradnji sa prestižnim univerzitetima diljem cijelog svijeta.

**NAJRAZNOVRSNJI!** Sveobuhvatan je jer pokriva područja humanističkih, društvenih, medicinskih, prirodno-matematičkih i biotehničkih te tehničkih nauka i umjetnosti koje se izučavaju na njegovim fakultetima i akademijama, a koje pružaju mogućnost da se na više od 500 studijskih programa može upisati izabrani studij. Studenti na našem univerzitetu mogu studirati kao redovni, redovni samofinansirajući i vanredni studenti, a također je moguće odabrati i Distance Learning studij (studiranje na daljinu) kao i studij na engleskom jeziku na jednom broju studijskih programa. I na koncu, diploma koja se dobije po okončanju studija je prepoznata u evropskom prostoru visokog obrazovanja.

**NAJBOLJI!** Primjenjujući principe Bolonjske deklaracije, studiranjem na Univerzitetu u Sarajevu studenti imaju priliku uživati kvalitetno visoko obrazovanje, razvijati svoje ideje i usavršavati svoje kompetencije. Studentima se pruža i mogućnost međunarodne razmjene kroz brojne projekte mobilnosti. Jedan od njih je i Erasmus Mundus u kojem naš univerzitet učestvuje od 2008. godine. Univerzitet u Sarajevu daje i mogućnost stipendiranja studenata kroz vlastite fondove: „Suada Dilberović“ i „Akademik Edhem Čamo“.

Stoga, dragi naši budući studenti, na vama je da izaberete ono što želite i volite, a ovaj vodič će vam poslužiti da lakše donesete odluku o tome šta i kako dalje.



## Upis

U prvu godinu studija kandidati se upisuju u skladu sa planom upisa studenata. Konkurs za upis u prvu godinu I ciklusa studija se raspisuje polovinom juna tekuće godine.

Konkurs se objavljuje na web stranici Univerziteta u Sarajevu Sarajevu ([www.unsa.ba](http://www.unsa.ba)), a obavijest o raspisivanju konkursa je dostupna u dnevnoj štampi. Organizacione jedinice će na svojim web stranicama/oglasnim pločama dati potpune informacije o mjestu i vremenu predaje dokumenata za prijavu na konkurs.

### KO SE MOŽE UPISATI

Pravo učešća na konkurs pod jednakim uvjetima imaju državljani Bosne i Hercegovine i strani državljani sa završenom srednjom školom u četverogodišnjem trajanju u Bosni i Hercegovini, kao i kandidati koji su srednju školu završili izvan Bosne i Hercegovine, a za koje je nakon postupka nostrifikacije odnosno ekvivalencije utvrđeno da imaju završeno adekvatno obrazovanje za nastavak školovanja.

Izuzetno, kandidati koji su srednju školu završili izvan Bosne i Hercegovine imaju pravo učešća na konkursu i prije izvršene nostrifikacije odnosno ekvivalencije svjedočanstva o završenom srednjem obrazovanju u inozemstvu, ali se u prvu godinu studija mogu upisati nakon izvršene nostrifikacije odnosno ekvivalencije o završenom srednjem obrazovanju u inozemstvu, a najkasnije do početka akademske godine.

Pravo učešća na konkursu i polaganje prijemnog ispita imaju i kandidati sa završenom srednjom školom po međunarodnim programima koji su odobreni od nadležnog ministarstva, kao i kandidati iz država nastalih nakon raspada SFRJ, s tim što su dužni dostaviti svjedočanstvo o završenoj srednjoj školi odnosno nostrificirano svjedočanstvo za kandidate koji prethodno obrazovanje nisu završili u Bosni i Hercegovini prije početka upisa.



### DOKUMENTI POTREBNI ZA UPIS

- Zahtjev za upis u kome je tačno naznačen odsjek na koji konkurira
- Originalna svjedočanstva o završenim razredima srednje škole završene u Bosni i Hercegovini u četverogodišnjem trajanju odnosno odgovarajuće nostrificirane dokumente za kandidate koji srednju školu nisu završili u Bosni i Hercegovini (ukoliko su dokumenti u postupku nostrifikacije, prilažu se prevedeni i od sudskog tumača ovjereni dokumenti)
- Originalna diploma o završenoj srednjoj školi
- Izvod iz matične knjige rođenih
- Uvjerenje o državljanstvu
- Drugi dokumenti relevantni za utvrđivanje broja bodova po kriterijima, kao i eventualno ostali dokumenti navedeni u tekstu konkursa.

### NOSTRIFIKACIJA DOKUMENATA

Strani državljani koji se žele upisati na Univerzitet u Sarajevu moraju izvršiti nostrifikaciju svjedočanstva o završenoj srednjoj školi. Nostrifikaciju vrši Federalno ministarstvo obrazovanja i nauke. Više o nostrifikaciji na web stranici Ministarstva. ([www.fmon.gov.ba](http://www.fmon.gov.ba)).



## PRIJEM KANDIDATA

Izbor kandidata vrši se na osnovu Odluke o kriterijima i mjerilima za utvrđivanje redoslijeda prijema kandidata za upis studenata u prvu godinu studija na organizacione jedinice Univerziteta u Sarajevu, koja je sastavni dio konkursa, kao i pojedinačnih kriterija utvrđenih za vrednovanje ocjena iz predmeta relevantnih za odgovarajući studijski program i vrednovanje rezultata prijemnih ispita ukoliko su predviđeni. Ukoliko je za prijem studenata predviđeno polaganje prijemnog ispita, svaka organizaciona jedinica utvrđuje datum i raspored polaganja prijemnog ispita, kao i sadržaj i način polaganja prijemnog ispita, što će objaviti na svojim web stranicama/oglasnim pločama.

## PRELIMINARNA RANG-LISTA

Preliminarnu rang-listu svih primljenih i prijavljenih kandidata organizacione jedinice će objaviti na web stranici i oglasnoj ploči nakon što je verificira vijeće organizacione jedinice, najkasnije dva dana od posljednjeg dana polaganja prijemnog ispita, a za organizacione jedinice na kojima se prijemni ispit ne polaže – najkasnije dva dana nakon isteka roka za podnošenje prijave na konkurs.

## TROŠKOVI STUDIJA

Visina participacije cijena usluga i školarina Univerziteta u Sarajevu, te fakulteta i akademija u njegovom sastavu utvrđena je Odlukom Vlade Kantona Sarajevo o davanju saglasnosti na visinu participacije cijena usluga, upisnina i drugih troškova studija Univerziteta u Sarajevu, te fakulteta i akademija u njegovom sastavu.

## STUDIJ

Studij prvog ciklusa na Univerzitetu organizira se i ostvaruje u skladu sa Zakonom o visokom obrazovanju Kantona Sarajevo i Pravilima studiranja zasnovanim na Evropskom sistemu prijenosa kredita (ECTS).

## TRAJANJE STUDIJA

Studij prvog ciklusa za stjecanje diplome traje tri odnosno četiri godine, a vrednuje se sa 180 odnosno 240 ECTS studijskih bodova. ECTS studijski bodovi odgovaraju kriterijima Evropskog sistema prijenosa kredita – European Credit Transfer System (ECTS).

## STUDIJSKI PROGRAMI

Fakulteti i akademije Univerziteta u Sarajevu pružaju mogućnost da se na više od 500 studijskih programa može upisati izabrani studij. Studijski programi dostupni su na web stranici Univerziteta <http://unsa.ba/s/rsp/tabela.html>.

## ORGANIZACIJA NASTAVE

Studijska godina se organizira u dva semestra: zimski i ljetni. Nastava u zimskom semestru počinje trećeg ponedjeljka u septembru i traje 16 sedmica (15 sedmica kontinuiranih aktivnosti + 1 sedmica za završne ispite). Dopunska nastava i popravni ispiti traju najduže 4 sedmice. Ovjera zimskog i upis ljetnog semestra (i zimski odmor) traju 2 sedmice. Nastava u ljetnom semestru počinje trećeg ponedjeljka u februaru i traje 16 sedmica (15 sedmica kontinuiranih aktivnosti + 1 sedmica za završne ispite). Dopunska nastava i popravni ispiti traju najduže 4 sedmice.



## PRIJAVLJIVANJE PREDMETA

Student je obavezan prijaviti predmete koje želi slušati i polagati u narednoj studijskoj godini tri sedmice prije početka nastave u zimskom semestru, a za prvu studijsku godinu nakon upisa. Prijavlјivanje ispita vrši se i putem jedinstvenog softvera studentske službe Univerziteta ([www.isss.ba](http://www.isss.ba)). Izbor predmeta vrši se do 30 ECTS studijskih bodova opterećenja za semestar i 60 ECTS studijskih bodova za godinu.

## OVJERA SEMESTRA

Ovjera semestra i godine obavezna je za sve studente. Na osnovu ovjerenog semestra i godine utvrđuje se koliko je student postigao ECTS studijskih bodova.

## OCJENJIVANJE

Konačan uspjeh studenta nakon svih predviđenih oblika provjere znanja vrednuje se i ocjenjuje sistemom uporedivim sa ECTS sistemom, kako slijedi:

- 10 (A) – (izuzetan uspjeh, bez grešaka ili sa neznatnim greškama), nosi 95–100 bodova,
- 9 (B) – (iznad prosjeka, sa ponekom greškom), nosi 85–94 bodova,
- 8 (C) – (prosječan, sa primjetnim greškama), nosi 75–84 bodova,
- 7 (D) – (općenito dobar, ali sa značajnijim nedostacima), nosi 65–74 bodova,
- 6 (E) – (zadovoljava minimalne kriterije), nosi 55–64 bodova,
- 5 (F, FX) – (ne zadovoljava minimalne kriterije), manje od 55 bodova.

## PROVJERA ZNANJA

Oblici provjere znanja mogu biti pisani, usmeni i praktični. Provjera znanja je, po pravilu, pisana i vrši se putem testa ili pisanog rada.

## ISPRAVE O STUDIJIMA

Student koji je položio sve ispite predviđene za upisani studijski program i ispunio sve ostale obaveze propisane Statutom Univerziteta i ovim pravilima stiče diplomu prvog ciklusa studija odgovarajućeg studijskog programa i odgovarajuće stručno zvanje bakalaureata/bachelora.

Uz diplomu dodiplomskog studija izdaje se i dodatak diplomi (diploma supplement) radi detaljnijeg uvida u nivo, prirodu, sadržaj, sistem i pravila studiranja i postignute rezultate tokom studija.

## DIPLOMA

Diploma je javna isprava kojom se dokazuje da je stečena kvalifikacija rezultat uspješno završenog ciklusa studija.

Visokoškolska ustanova izdaje diplomu studentu koji je uspješno završio sve obaveze utvrđene studijskim programom prvog ciklusa studija visokog obrazovanja.

## DODATAK DIPLOMI

Dodatak diplomi je javna isprava koju visokoškolska ustanova obavezno izdaje uz diplomu.







## Međunarodna saradnja

Jedan semestar u Sarajevu ... drugi semestar u Grazu ... istraživanje u Barceloni ... Da li znate da, ukoliko budete studirali na Univerzitetu u Sarajevu, možete studirati na još nekom svjetskom univerzitetu? Kako? Služba za međunarodnu saradnju Univerziteta u Sarajevu je tu da vas s tim upozna.

Univerzitet u Sarajevu je partner u mnogim programima međunarodne razmjene, gdje studenti mogu planirati da provedu jedan ili dva semestra na nekom evropskom, američkom ili možda azijskom univerzitetu. Postoji više programa razmjene sa kojima ćete se susresti u toku vašeg školovanja na Univerzitetu u Sarajevu. Svakako najpopularniji programi razmjene su oni koji pored omogućavanja da provedete jedan semestar u inostranstvu uključuje i finansijsku podršku (stipendiju). Boravkom na nekom od univerziteta izvan Bosne i Hercegovine imate priliku da proširite svoja lingvistička, kulturološka i obrazovna iskustva, upoznate nove ljude, sklopite dugotrajna prijateljstva, naučite strani jezik te upoznate se sa drugačijim pristupom studija.

**Erasmus+** je program razmjene preko kojeg možete već drugi semestar svog studija provesti na nekom od prestižnih evropskih univerziteta (Barceloni, Berlinu, Londonu, Parizu, Grazu, Zagrebu ili još nekom od stotinjak dostupnih univerziteta sa kojima Univerzitet u Sarajevu ima potpisan sporazum), slušati predavanja, polagati ispite i ostvariti potrebne ECTS bodove. Erasmus+ uključuje i stipendiju koja se sastoji od mjesečnog finansijskog iznosa kojim pokrivete vaše životne troškove i putnih troškova.



**Mevlana** je program čiji je cilj razmjena studenata između Univerziteta u Sarajevu i turskih obrazovnih institucija. Preko ovog programa, jedan ili dva semestra (zavisno od ponude) možete provesti na nekom partnerskih univerzitetu u Turskoj. Ovdje studenti dobijaju stipendiju u skladu sa iznosom koji odredi Izvršni odbor Vijeća za visoko obrazovanje Turske, dok putne troškove snose sami. Više informacija o Mevlan programu možete dobiti od Službe za međunarodnu saradnju Univerziteta u Sarajevu.



**CEEPUS** (Central European Exchange Programme for University Studies) je srednjoevropski program za razmjenu studenata i profesora. Ovaj program omogućava mobilnost studenata na univerzitete u državama članicama CEEPUS-a (pored Bosne i Hercegovine): Austrija, Albanija, Bugarska, BJR Makedonija, Crna Gora, Češka Republika, Hrvatska, Mađarska, Moldavija, Poljska, Rumunija, Slovačka, Srbija, Slovenija. Detaljne informacije i cjelokupna dokumentacija potrebna za konkurisanje nalazi se na web stranici CEEPUS III programa ([www.ceepus.info](http://www.ceepus.info)) kao i kroz komunikaciju sa prodekanima/koordinatorima za međunarodnu saradnju na vašem fakultetu/akademiji.



## Međunarodna saradnja

Pored ovih programa, dostupni su i ostale vrste finansijske i akademske podrške za razmjenu na koje se možete prijaviti: DAAD (saradnja i razmjena sa njemačkim univerzitetima), Fullbright (razmjena sa američkim univerzitetima), CMEPIUS (obrazovni program razmjene sa Republikom Slovenijom), VISEGRAD fund (stipendije za razmjenu sa Češkom Republikom, Mađarskom, Poljskom i Slovačkom) te ostale mogućnosti zastupljene na bilateralnoj osnovi.

Ako želite učestvovati u mobilnosti, morate imati u vidu da je neophodno detaljno i redovno pregledanje web stranica na kojima možete pronaći podatke o mogućnostima razmjene i studiranja na univerzitetima van Bosne i Hercegovine, kao i o mogućnostima stipendiranja. Srećom za vas, Služba za međunarodnu saradnju Univerziteta u Sarajevu je sve informacije obuhvatila na jednoj web stranici [www.erasmus-unsaba.ba](http://www.erasmus-unsaba.ba). pored naše web stranice, prisutni smo i na društvenim mrežama:

Facebook: [www.facebook.com/iro.unsa](https://www.facebook.com/iro.unsa)


Twitter: @UNSAerasmus

Instagram: univerzitetusarajevu

YouTube: IRO UNSA



Svakako pratite obavještenja na našim web i društvenim stranicama, a često naša Služba organizuje i info dane gdje zajedno sa studentima koji su već boravili u inostranstvu objašnjavamo u detalje prijavu na ove stipendije, prikupljanje dokumentacije te cijeli proces od slanja, dobijanja stipendije do odlaska u inostranstvo. Ovo je prilika koju ne bi smjeli propustiti, jer međunarodno iskustvo koje steknete u toku školovanja će vam doprinjeti boljem pozicioniranju na tržištu rada nakon završetka.





## Podrška studentima sa posebnim potrebama



Univerzitet u Sarajevu je jedini univerzitet u Bosni i Hercegovini na kojem je regulirano i pitanje studenata sa posebnim potrebama. Na nivou Univerziteta osnovan je Ured za podršku studentima sa posebnim potrebama.

Ured za podršku studentima sa posebnim potrebama Univerziteta u Sarajevu je koordinacijsko tijelo u sastavu Univerziteta u Sarajevu koje doprinosi stvaranju društva kojem svaka osoba pripada, u kojem on/ona uzima aktivno učešće, te koje je spremno pružiti podršku studentima sa posebnim potrebama putem:

- uspostavljanja i održavanja partnerstva sa fakultetima i akademskim osobljem,
- promicanja svijesti na Univerzitetu o pitanjima studenata sa posebnim potrebama,
- davanja smjernica u vezi sa politikom i procedurama na Univerzitetu koje osiguravaju punu participaciju studenata sa posebnim potrebama u svim aspektima studentskog života.

Zadatak Ureda za podršku studentima sa posebnim potrebama Univerziteta u Sarajevu jeste osigurati da studenti sa posebnim potrebama imaju jednak pristup svim univerzitetskim programima i aktivnostima. Ured pruža priliku studentima sa posebnim potrebama da ostvare svoj puni potencijal tako što:

- koordinira aktivnosti akademske prilagodbe i servisa za podršku,
- promiče samostalnost i samozastupanje,
- pruža informacije i upućuje na odgovarajuće izvore.

Kroz svoje aktivnosti Ured za podršku studentima sa posebnim potrebama će potaknuti studente sa posebnim potrebama da postanu odgovorne osobe koje mogu donositi vlastite odluke, rješavati svoje probleme i zastupati svoje interese.

### Adresa Ureda:

Filozofski fakultet u Sarajevu  
Franje Račkog 1 (soba br. 8)  
71000 Sarajevo,  
br. tel.: +38733/253-290  
e-mail: [ured@unsa.ba](mailto:ured@unsa.ba)





## Gdje stanovati

### STUDENTSKI DOM NEDŽARIĆI

Aleje Bosne srebrene bb.

[www.student-centar.ba](http://www.student-centar.ba)

Studentski dom Nedžarići nalazi se u općini Novi Grad sa smještajnim kapacitetom od 960 mjesta. U sklopu studentskog doma Nedžarići nalazi se studentski restoran, kafe-picerija, park, sala za programe, multimedijalni centar i biblioteka, čitaonica, nogometno i košarkaško igralište, dva teniska terena, sto za stoni tenis i kopirnica. U sklopu svojih sadržaja SD Nedžarići svojim stanarima organizira brojna kulturno-sportska dešavanja kao i mnogobrojne kurseve i predavanja iz različitih oblasti. Zavisno od sobe, cijena stanovanja se kreće od 154 KM do 169 KM.



### STUDENTSKO NASELJE BJELAVE

Bardakčije br. 1.

[www.student-centar.ba](http://www.student-centar.ba)

Studentsko naselje Bjelave nalazi se u općini Centar. Sastoji se od devet paviljona sa smještajnim kapacitetom od oko 1000 mjesta. U sklopu studentskog naselja Bjelave nalazi se studentski restoran, kafe-bife, park, sala za programe, multimedijalni centar i biblioteka, vanjski amfiteatar, nogometno i košarkaško igralište, sto za stoni tenis i kopirnica. U sklopu svojih sadržaja SN Bjelave svojim stanarima organizira brojna kulturno-sportska dešavanja

kao i mnogobrojne kurseve i predavanja iz različitih oblasti. JU Studentski centar u sklopu Studentskog naselja Bjelave u toku ljetnog raspusta formira ljetnu recepciju kako bi se u tome periodu omogućio smještaj studenata u toku trajanja ljetne škole i pripremne nastave za upisnike na fakultete.

Zavisno od sobe cijena stanovanja se kreće od 154 KM do 169 KM.



### PRIVATNI SMJEŠTAJ

Veliki broj studenata odlučuje se i za privatni smještaj gdje cijena zavisi o tome da li je smještaj bliže centru ili dalje, kao i veličine stambenog prostora.

Okvirna mjesečna cijena stanovanja se kreće od 150 KM i više.





## JUKS Zavod za zdravstvenu zaštitu zdravlja studenata Univerziteta u Sarajevu

Patriotske lige br. 36  
[www.zdravljestudenata.ba](http://www.zdravljestudenata.ba)

Zavod za zdravstvenu zaštitu zdravlja studenata Univerziteta u Sarajevu egzistira preko 60 godina i pruža zdravstvenu zaštitu mladima sa statusom studenta Univerziteta u Sarajevu za vrijeme studiranja (u periodu od 19. do 26. godine). Kao primarni cilj ima očuvanje i brigu o zdravlju studenata, no misija je i uspostaviti odnos pun povjerenja i uzajamnog poštovanja između medicinskog osoblja i pacijenata te promovirati zdrav način života i brigu o vlastitom tijelu i umu kod studenata.

### Vizija

Naša vizija razvoja ove institucije za mlade kao i Univerzitet u Sarajevu je afirmacija svih edukativnih programa i sadržaja kao i

predavanja iz oblasti zdravstvene kulture, prevencije i svih drugih tema koje se odnose na različite patologije, a koja su nažalost, sve više zastupljena i kod mladih. Ultimativni cilj medicinske nauke i struke je preventivno djelovanje. Zavod za zdravstvenu zaštitu studenata Univerziteta u Sarajevu je u poziciji da se na najuspješniji način bavi time.



## STUDENTSKI PARLAMENT UNIVERZITETA U SARAJEVU

Zmaja od Bosne 8  
[www.spus.ba](http://www.spus.ba)

Glavni ciljevi Studentskog parlamenta su poboljšanje kvalitete obrazovanja i studentskog standarda, kao i povezivanje sa ostalim studentskim organizacijama u BiH, regionu i ostalim dijelovima svijeta.

Implementacijom Bolonjskog procesa na području zapadne Evrope započeo je i novi trend uređenja pitanja studentskog organiziranja s ciljem povećanja stepena efikasnosti kada je u pitanju realizacija i zaštita prava studenata. Takav trend podrazumijeva u prvom planu postojanje jedne organizacije koja će predstavljati sve studente određenog univerziteta. Realizacija tog projekta ostvarena

je kroz uspostavljane Studentskog parlamenta, kao krovne i jedine legitimne organizacije koja zastupa interese svih studenata.

U januaru 2008. godine na osnivačkoj skupštini osnovan je Studentski parlament Univerziteta u Sarajevu, kao jedina, krovna i legitimna organizacija, koja predstavlja interese svih studenata Univerziteta u Sarajevu, za čijeg prvog predsjednika je izabran Haris Hasanspahić. Glavni zadatak SPUS-a je promoviranje i zaštita prava svih studenata Univerziteta u Sarajevu, te upravo zbog toga rad Studentskog parlamenta ovisi prije svega od jedinstva studenata, koje se ostvaruje kroz pružanje podrške svih fakultetskih studentskih organizacija Studentskom parlamentu.







# FAKULTETI I AKADEMIJE



## EKONOMSKI FAKULTET

Trg oslobođenja–Alija Izetbegović 1  
033 253-786  
pr@efsa.unsa.ba  
www.efsa.unsa.ba

### Zašto odabrati?

Ekonomski fakultet u Sarajevu je sa svojom tradicijom, međunarodnom orijentacijom, zalaganjem nastavnog kadra i jasnom vizijom menadžmenta postao lider u oblasti obrazovanja na području ekonomskih i poslovnih nauka. Studenti imaju priliku studirati po najvišim evropskim standardima i time stječu konkretna, temeljna i specijalistička znanja iz različitih oblasti ekonomije, te se osposobljavaju za rad i djelovanje u svim proizvodnim, finansijskim i društvenim djelatnostima.

EFSA je prepoznat kao jedini fakultet u Bosni i Hercegovini koji posjeduje međunarodne akreditacije koje ga svrstavaju u 5% najboljih u svijetu u području ekonomskih nauka.

Prvi ciklus studija koncipiran je u nekoliko programa, u trajanju od 3 godine, uključujući stručnu praksu i diplomski rad. Studenti mogu odabrati jedan od tri odsjeka na bosanskom jeziku: Ekonomija, Menadžment i Visoka poslovna škola. Na engleskom jeziku postoji mogućnost studiranja na 2 odsjeka: Menadžment i Sarajevo Business School. Pored redovnog načina studiranja, budući studenti mogu odabrati i studij učenja na daljinu-DL-studij.

### Šta poslije završetka studija?

Naš fakultet studentima pruža mnogobrojne mogućnosti stjecanja praktičnog iskustva, radnih navika i vještina koje će ih učiniti konkurentnim na tržištu rada.

Jedan od primjera je stjecanje iskustva kroz obavezu ferijalnu praksu na trećoj godini studija. Usto, u sklopu Fakulteta djeluju centri koji na različite načine angažiraju studente kako bi teoretsko znanje praktično primjenjivali: Centar za preduzetništvo, Centar za menadžment i informacione tehnologije, Centar za međunarodnu saradnju, Centar za razvoj karijere studenata, Centar za islamsko bankarstvo, Ured za odnose s javnošću i Ured za kvalitet.

Na temelju prethodnih iskustava, činjenica je da naši studenti nakon završetka studija pronalaze posao kako u domaćim tako i svjetskim kompanijama. Shodno navedenom, Ekonomski fakultet je s razlogom jedan od najboljih ekonomskih fakulteta u BiH i regiji.



## FAKULTET ZA KRIMINALISTIKU, KRIMINOLOGIJU I SIGURNOSNE STUDIJE

Zmaja od Bosne 8  
033 561-201  
fkn@fkn.unsa.ba  
www.fkn.unsa.ba

### Zašto odabrati?

Fakultet za kriminalistiku, kriminologiju i sigurnosne studije realizira savremene studijske programe unutar matičnih naučnih oblasti – kriminalistika, kriminologija i sigurnosne studije, organizirane kroz prvi, drugi i treći ciklus studija, a bazirane na konceptu 4+1+3, što znači: četiri godine prvog ciklusa studija, jedna godina drugog ciklusa studija i tri godine doktorskog studija. Budući da se Fakultet nastoji prilagoditi najvišim evropskim i međunarodnim standardima kvaliteta, u tu svrhu ostvaren je i zavidan nivo saradnje sa srodnim fakultetima u Evropi i svijetu koji studentima treba omogućiti veću mogućnost izbora i vlastitog utjecaja na kreiranje programa koje slušaju i polažu, te studiranje na partnerskim institucijama. Pored redovnog pohađanja studija, pružamo mogućnost i izvođenja E-nastave korištenjem vrhunskih IKT-sistema.


Fakultet za kriminalistiku, kriminologiju i sigurnosne studije nudi: kvalitetno i zdravo okruženje, stručan i iskusen akademski kadar, praksu na institutu „CriminalEast“, studentske aktivnosti kroz studentsku asocijaciju, sportske aktivnosti kroz Sportski klub FKKSS, učešće u ljetnim i zimskim školama koje organiziramo, različite aktivnosti u saradnji sa našim brojnim domaćim i međunarodnim partnerima.

### Šta poslije završetka studija?

Nakon završenog studija na Fakultetu za kriminalistiku, kriminologiju i sigurnosne studije student je osposobljen da obavlja poslove u vezi sa provedbom zakona iz oblasti javne uprave, poslove koji se odnose na državne organe, carinu, poreze, zaštitu, policijsku službu, analitiku, detektivsku djelatnost, pravosuđe, bankarski sektor, sektor privatne sigurnosti, fizičku i tehničku zaštitu lica i objekata, osiguravajuća društva, izdavanje isprava i dozvola, nadzor nad ostalim saradnicima.

Naši svršeni studenti mogu obavljati saradničku i savjetodavnu ulogu tužiocima i advokatima. U sklopu navedenih aktivnosti posebno mogu obavljati istraživanje činjenica koje se odnose na počinjenja krivičnih djela radi otkrivanja i identificiranja počinitelja i krivičnih djela, prikupljanja obavijesti o osobama i institucijama, obično s ciljem prevencije nedopuštenog ponašanja, ispitivanje sumnjivog ponašanja, privođenje po nalogu ili nadležnosti, čuvanje osoba lišenih slobode i svjedočenje na sudu..





## FAKULTET POLITIČKIH NAUKA

Skenderija 72  
033 203 562; 033 666 884  
dekanat@fpn.unsa.ba  
www.fpn.unsa.ba

### Zašto odabrati?

Ukoliko se zanimате za izazove koji u današnjem svijetu dolaze iz društvene, političke i sigurnosne sfere, te ih želite razumijevati i o njima diskutirati sa ekspertima koji oblikuju bosanskohercegovačko javno mnijenje, onda je Fakultet političkih nauka Univerziteta u Sarajevu pravi izbor za nastavak školovanja.

Fakultet nudi preko 150 predmeta – od fundamentalno-teorijskih do niza specijalističko-aplikativnih disciplina – kroz koje se tretiraju gotovo svi aspekti savremenog društvenog života. Na ovaj način se studenti nakon okončanja studija spremaju da se suoče sa različitim društvenim, političkim i sigurnosnim izazovima u realnom životu i stečena znanja apliciraju u praksi.

Komparativnu prednost poslije okončanja studija predstavlja činjenica da se radi o visokoškolskoj instituciji sa najdužom tradicijom izučavanja politologije, sociologije, novinarstva, sigurnosti, mirovnih studija i socijalnog rada u našoj državi, te da veliki broj svršenih studenata Fakulteta aktivno participira i upravlja društvenim i političkim tokovima u Bosni i Hercegovini, pokazujući tako da ova visokoškolska institucija nudi znanja i vještine upotrebljive u praksi.

### Šta poslije završetka studija?

Fakultet političkih nauka pruža osnovu za profesionalnu osposobljenost za rad u raznim vladinim tijelima i institucijama, privatnom i nevladinom sektoru, institucijama kulture, obrazovanja.

### Da li sam sa diplomom FPN-a konkurentan na tržištu rada u EU i kako?

Iskustva naših svršenih studenata koji rade u zemljama Europske unije pokazala su da nema teškoća prilikom priznavanja diploma Fakulteta, odnosno Univerziteta u Sarajevu. Budući da je tržište rada EU izuzetno veliko, ono osim znanja stečenih tokom školovanja zahtijeva i druge vještine koje studenta čini kompetitivnim. Fakultet političkih nauka kroz svoje programe osnažuje studente da se usavršavaju i van redovnog obrazovanja, kako bi mogli iskoristiti priliku koja im se može ponuditi i u EU.

### Gdje će mi sa diplomom FPN-a biti otvorena vrata posla u mojoj državi?

Nakon što uspješno okončaju studij, svršeni Fakulteta političkih nauka mogu raditi u različitim državnim institucijama, političkim strankama, znanstvenim ustanovama, istraživačko-analitičkim institutima, oblasti političkog konsaltinga, međunarodnim organizacijama i nevladinim civilno-društvenim asocijacijama.





## PRAVNI FAKULTET

Obala Kulina bana 7  
033 206-350; 206-360  
sekretarijat@pfsa.unsa.ba  
www.pfsa.unsa.ba

### Zašto odabrati?

Nastavni plan i program na Pravnom fakultetu u Sarajevu je koncipiran tako da ima za cilj razvijanje pravničkog mišljenja i opće pravničke kulture studenata, obuhvatanjem širokog spektra različitih naučnih disciplina. Težnja je da student razumije porijeklo, uzroke nastanka i funkcioniranja pravnog sistema, njegove osnovne principe i odnos prava prema stvarnim odnosima u životu, kao i drugim naučnim disciplinama.

### Šta poslije završetka studija?

Zahvaljujući široko postavljenom nastavnom planu koji studentima pruža opće obrazovanje i razumijevanje prava, diplomantima se omogućava, uz ispunjenje nekih dodatnih uvjeta, zaposlenje u javnom sektoru, bavljenje slobodnim zanimanjem advokata ili notara ili da rade u privatnom sektoru, uglavnom kao pravnik u preduzećima ili kao pravni savjetnik u konsultantskim i revizorskim firmama.







## FAKULTET ZA UPRAVU

Igmanska 40A, Vogošća  
033 553-837  
fakultet@fu.unsa.ba  
www.fu.unsa.ba

### Zašto odabrati?

Djelovanje u pravcu reforme javne uprave zasnovano prvenstveno na edukaciji novih visokostručnih kadrova za državnu službu i cjelokupan administrativni sektor, a radi uspostavljanja funkcionalnog sistema uprave u BiH i doprinosa javnoj službi po uzoru na praksu Evropske unije, osnovni je motiv osnivanja i djelovanja Fakulteta za upravu.

**Studijski program „Uprava“ traje četiri godine (240 ECTS). Nastava se u prve tri godine studija odvija prema istovjetnom nastavnom planu i programu za sve studente. U sedmom i osmom semestru studenti se mogu odlučiti između tri smjera: „Uprave“, „Poslovne uprave“ i „E-uprave“**

**Pratimo tržišne trendove i potrebe studenata te omogućujemo:**

- **Stručne prakse** koje dugi niz godina uspješno realiziramo u saradnji sa jedinicama lokalne samouprave u Kantonu Sarajevu i šire, s ciljem olakšanja prelaska sa studija na prvo radno mjesto;
- **Dodatno obrazovanje** (kroz razmjenu studenata putem programa međunarodne saradnje Univerziteta u Sarajevu sa evropskim univerzitetima, zatim kroz rad u demonstratorskim timovima, kroz učestvovanje na naučno-stručnim skupovima i projektima i dr.);
- **Saradnju sa privredom (studijske posjete poslovnim subjektima u BiH).**

### Šta poslije završetka studija?

Shodno odabranom smjeru na četvrtoj godini studija, student odbranom završnog/diplomskog rada odnosno okončanjem prvog ciklusa studija na Fakultetu za upravu u Sarajevu stječe jedno od sljedećih zvanja: **bachelora uprave – smjer uprave, bachelora uprave – smjer poslovne uprave, bachelora uprave – smjer E-uprave.**

Bakalaureat/bachelor uprave je osposobljen za rad u organima državne uprave, javnim preduzećima, ustanovama koje raspoložu javnim ovlaštenjima, privatnim firmama u kojima se traži rad na upravnom rješavanju, međunarodnim organizacijama i drugim institucijama za obavljanje poslova upravnog rješavanja, upravno-nadzornih, studijsko-analitičkih, normativno-pravnih i stručnih operativnih poslova. Također je osposobljen za izrade planskih akata i projekata, pripreme, izrade i praćenja budžetskih planova te upravljanje ljudskim resursima i rukovodećim poslovima.





## FAKULTET ZDRAVSTVENIH STUDIJA

Bolnička br. 25  
033 569-800; 033 569-807  
info@fzs.unsa.ba; dekan@fzs.unsa.ba  
www.fzs.unsa.ba

### Zašto odabrati?

Specifičnost Fakulteta zdravstvenih studija je u tome što se brine za one dijelove zdravstvene zaštite neophodne da zadovolje sve širu i sveobuhvatniju multidisciplinarnu, neinvazivnu i invazivnu dijagnostiku i terapiju na najvišem nivou, sa najsavremenijom opremom i metodama koje se koriste u svijetu.

Zalaganjem i radom svih uposlenika Fakultet zdravstvenih studija u Sarajevu je dobio Certifikat sistema osiguranja i upravljanja kvalitetom po normi ISO 9001:2008 od ugledne certifikacijske kuće Bureau Veritas.

U narednom periodu namjerava se realizovati postavljeni strateški cilj dobijanja akreditacije, čime bi se omogućila internacionalna prepoznatljivost Fakulteta.

Važno je spomenuti da je u aprilu 2011. godine izašao prvi broj naučno/stručnog časopisa Journal of Health Sciences, čiji je izdavač Fakultet zdravstvenih studija u Sarajevu.

U ime svih nastavnika i saradnika Fakulteta zdravstvenih studija želim vam puno uspjeha u studiranju, uspješnu saradnju s nastavnicima i kolegama, te da se završetkom odabranog studija pridružite porodici od 3752 zdravstvena profesionalca, koji su u proteklih četrdesetak godina diplomirali i magistrirali na Fakultetu zdravstvenih studija u Sarajevu.

### Šta poslije završetka studija?

Nakon završenog studija studenti razumiju i sposobni su planirati i primijeniti principe i sadržaje oblasti:

- kliničke hemije i biohemije, hematologije, mikrobiologije, citodijagnostike, kao i pružanje usluga u laboratorijama molekularne biologije,
- radiodijagnostike, nuklearne medicine i radioterapije s ciljem unapređenja i poboljšanja zdravlja,
- sanitarno-higijenske i epidemiološke principe na užem i širem području u redovnim i vanrednim uvjetima, a s ciljem unapređenja i poboljšanja zdravlja,
- kineziologije, terapije pokretom, re/habilitacije i okupacione terapije s ciljem unapređenja i poboljšanja zdravlja.

Fakultet zdravstvenih studija Univerziteta u Sarajevu će kroz nastavu temeljenu na istraživanjima, inovacijama i akademskoj izvrsnosti obrazovati nosioce zdravstvene profesije (bachelor (BA) i master (MA) fizikalne terapije, laboratorijskih tehnologija, radioloških tehnologija, zdravlja i ekologije i zdravstvene njege i terapije) Bosne i Hercegovine, te kroz istraživački rad poticati stvaranje novih vrijednosti u zdravstvu i na taj način biti oslonac održivog razvoja Bosne i Hercegovine temeljenog na znanju.





## FARMACEUTSKI FAKULTET

Zmaja od Bosne 8  
033 586 180  
www.ff.unsa.ba

### Zašto odabrati?

Obrazovanje na Farmaceutskom fakultetu je pedagoški proces koji je u svom sistemu obrazovanja usko povezan sa onim što se smatra ulaznim i izlaznim karakteristikama. Ono u konačnom ima za cilj oblikovanje farmaceuta kao stručnjaka koji se, prema ukupnosti svojih osobina, znanja i sposobnosti, izdvajaju i razlikuju od drugih fakultetski obrazovanih struka. Kandidati se na Farmaceutski fakultet upisuju nakon završene srednje škole, uz položen prijemni ispit iz hemije, biologije i matematike prema konkursu koji raspisuje Ministarstvo za obrazovanje, nauke i mlade Kantona Sarajevo. Programom studija „magistar farmacije“ osposobljava se da sa farmaceutskog, hemijskog, biohemijskog, molekularno-biološkog i medicinskog stajališta istražuje, razvija i primjenjuje lijekove. Stječe i specifična znanja potrebna u istraživanju i razvoju te primjeni lijekova.

Akademsko zvanje *magistra farmacije*, koje se stječe diplomiranjem na Farmaceutskom fakultetu Univerziteta u Sarajevu, korespondira sa zvanjem *Master of Pharmacy* za regulirane profesije i kvalifikacijama za farmaceute prema Direktivi 2005/36/EC Evropskog parlamenta i Savjeta Evropske unije o priznavanju stručnih kvalifikacija.

### Šta poslije završetka studija?

Magistar farmacije je nakon studija osposobljen da samostalno radi u apoteci na poslovima obezbjeđivanja, izrade i izdavanje lijekova, medicinskih sredstava i dijetetskih proizvoda. Samostalno radi u biohemijskim laboratorijama, razvija i primjenjuje različite metode i tehnike. Radi na razvoju i primjeni odgovarajućih analitičkih metoda i tehnika u naučnoistraživačkim, razvojnim, kontrolnim, biohemijskim i sintetskim laboratorijama. Samostalno radi na izolaciji principa iz prirodnih ljekovitih sirovina i karakterizaciji lijekova prirodnog porijekla te je aktivno uključen u provođenje fitoterapije. Samostalno provodi pretformulaciju, formulaciju, izradu/proizvodnju i vrednovanje farmaceutskih oblika/nosača lijekova u laboratorijskom i industrijskom opsegu kao i biofarmaceutsku karakterizaciju farmaceutskih oblika. Samostalno izvodi karakteristične farmaceutsko-tehnološke operacije u laboratorijskoj i industrijskoj proizvodnji farmaceutskih oblika. Predstavlja dio zdravstvenog stručnog tima u okviru koga sa ljekarima i drugim zdravstvenim radnicima obezbjeđuje provođenje racionalne farmakoterapije, kao i drugih aktivnosti u vezi sa prevencijom i liječenjem bolesti i promocijom zdravog načina života. Obavlja poslove povezane sa obezbjeđivanjem dostupnosti, distribucijom i marketingom lijekova, medicinskih sredstava, dijetetskih i kozmetičkih proizvoda.





## MEDICINSKI FAKULTET

Čekaluša 90

033 226-478

[medicinski.fakultet@mf.unsa.ba](mailto:medicinski.fakultet@mf.unsa.ba)

[www.mf.unsa.ba](http://www.mf.unsa.ba)

### Zašto odabrati?

Studij na Medicinskom fakultetu Univerziteta u Sarajevu odlikuje 70-godišnje iskustvo u nastavi i moderno obrazovanje. Otvorenost uključivanja u nastavni program pozitivnih elementa i iskustava modela nastave drugih medicinskih fakulteta obezbijedili su studij usklađen sa planovima studija zemalja okruženja, zapadnoevropskih zemalja i Direktivom Evropske unije.

Studij traje šest godina, kao i u svim zemljama potpisnicama Bolonjske deklaracije.

Raspored predmeta po semestrima i oblici nastave prilagođeni su što boljem usvajanju potrebnih znanja i vještina, koje su regulirane Zakonom o reguliranim profesijama i priznavanju inozemnih stručnih kvalifikacija. Nastava se realizira u sedam amfiteatara, 11 savremeno opremljenih sala za vježbe i pet laboratorija za stručni dijagnostički i naučnoistraživački rad. U kliničkim ustanovama, u kontaktu sa pacijentima, studenti stječu znanja o bolestima, načinu njihova prepoznavanja, sprečavanja, liječenja i rehabilitacije. Upoznaju se i sa osnovama znanstvenih istraživanja, a u pojedinim mogu i sudjelovati.

Po završetku studija student ostvaruje 360 ECTS, stječe zvanje doktora medicine i kompetentan je za obavljanje poslova doktora opće medicine.

### Šta poslije završetka studija?

Nakon završenog studija svršeni student Medicinskog fakulteta dobija diplomu i dodatak diplomi u kojem su upisani svi rezultati postignuti u toku studiranja, koji otvaraju vrata zaposlenja, usavršavanja i saradnje u domenu biomedicine i zdravstva u cijelom svijetu.

Nakon diplomiranja postoji širok spektar mogućnosti za buduće zaposlenje.

Doktor medicine je osposobljen za poslove primarne zdravstvene zaštite, te može samostalno raditi s ljudima kao zdravstveni profesionalac u bolnicama, javnom zdravstvenom sektoru, ili pak u drugim granama zdravstva – na naučnoistraživačkim institutima ili kao dio pravnih timova koji se bave vještačenjem te pravima pacijenata.

Doktor medicine može postati edukator ili se zaposliti u farmaceutsko-zdravstvenoj industriji. Konačno, otvorena je mogućnost nastavka školovanja na doktorskom studiju „Biomedicina i zdravstvo“ Medicinskog fakulteta Univerziteta u Sarajevu.



GRUPACIJA  
MEDICINSKIH  
NAUKA

## STOMATOLOŠKI FAKULTET

Bolnička 4a

033 226-663

[dentalschool@sf.unsa.ba](mailto:dentalschool@sf.unsa.ba); [ssluzba@sf.unsa.ba](mailto:ssluzba@sf.unsa.ba)

[www.sf.unsa.ba](http://www.sf.unsa.ba)

### Zašto odabrati?

Studij na Stomatološkom fakultetu Univerziteta u Sarajevu traje šest godina, XII semestara, nakon čega se stječe zvanje dr. dentalne medicine. Studij je koncipiran tako da se u prve dvije godine slušaju i polažu ispiti iz općih i pretkliničkih predmeta te se na taj način studenti pripremaju za rad sa pacijentima.

Nakon druge godine studenti su u direktnom kontaktu sa pacijentom uz stručni nadzor nastavnika i asistenata, a Fakultet im obezbjeđuje potrebnu opremu i materijal za rad. Kontinuirano se radi na poboljšavanju i usavršavanju planova i programa te se isti usklađuju sa planovima i programima u okruženju.

### Šta poslije završetka studija?

Nakon završenog integriranog studija I i II ciklusa na ovom fakultetu doktoru dentalne medicine je omogućen upis na doktorski studij, kao i drugi vidovi stručnog usavršavanja, odnosno specijalizacija stomatoloških disciplina.





## VETERINARSKI FAKULTET

Zmaja od Bosne 90

033 729-156

info@vfs.unsa.ba; studentska@vfs.unsa.ba

www.vfs.unsa.ba

### Zašto odabrati?

Veterinarski fakultet u Sarajevu je jedini takve vrste u Bosni i Hercegovini. Kompetencije (znanja i vještine) koje se stječu završetkom studijskog programa veterinarske medicine na Veterinarskom fakultetu u Sarajevu usklađene su sa odredbama Direktive 2005/36/EC Evropskog parlamenta i Vijeća Evrope o reguliranim profesijama, kao i OIE (Međunarodna organizacija za zdravlje životinja) preporukom o kompetencijama doktora veterinarske medicine za osiguranje kvaliteta nacionalnih veterinarskih službi. Student pohađa integrirani studijski program prvog i drugog ciklusa. Ovaj studij, prema nastavnom planu i programu, traje deset semestara ili pet godina. Veterinarski fakultet kroz programe TEMPUS, CEEPUS, VetNEST i Basileus aktivno učestvuje u razmjeni studenata, što studentu omogućava stjecanje novih saznanja u veterinarskoj medicini. Završetkom studija stječe se 300 ECTS bodova sa akademskim zvanjem doktora veterinarske medicine.

### Šta poslije završetka studija?

Mogućnosti zapošljavanja doktora veterinarske medicine su različite. Najveći broj dr. vet. med. Uobičajeno se zapošljava u veterinarskim stanicama i ambulancama čiji je osnovni zadatak zdravstvena zaštita životinja te izrada programa prevencije. Također, doktori veterinarske medicine mogu se zaposliti i u različitim upravnim (državna i entitetska ministarstva) i izvršnim organima (inspeksijski poslovi), veterinarskim (Veterinarski fakultet, instituti i zavodi, centri za reprodukciju) i obrazovnim ustanovama.

Svoje mjesto dr. vet. med. nalaze i u primarnoj stočnoj proizvodnji (farme i drugi oblici intenzivne stočarske proizvodnje), te u nadzoru kvaliteta hrane životinjskog porijekla u klaonicama, pogonima za preradu ribe, pogonima za preradu mesa, mlekarama i drugim oblicima prerađivačke industrije povezane sa animalnom proizvodnjom. Otvorena je mogućnost rada i u farmaceutskoj industriji na poslovima razvoja i kontrole lijekova, ali i kao zastupnici farmaceutskih kompanija za opskrbu i distribuciju veterinarskih i humanih lijekova.

Jedna od prednosti ovog studija je i mogućnost da, uz 300 ECTS bodova, kandidati mogu upisati doktorski studij bilo gdje u Bosni i Hercegovini ili svijetu, te ulazak u naučnoistraživačku sferu.





## FAKULTET ISLAMSKIH NAUKA

Ćemerlina 54  
033 232-982  
fin@fin.ba  
www.fin.unsa.ba

### Zašto odabrati?

Upisom na Fakultet islamskih nauka u Sarajevu studenti i studentice sebi osiguravaju uspješan nastavak obrazovanja u ugodnom ambijentu, naučnoj atmosferi i uz pomoć cijenjenih i na znanstvenoj sceni dokazanih autoriteta.

Studiranjem na Fakultetu pomaže se općem razvoju i napretku bosanskohercegovačkog društva u cjelini, posebno na planu afirmiranja univerzalnih duhovnih i moralnih vrijednosti i razbijanju brojnih stereotipa o islamu i muslimanima u Bosni i Hercegovini i svijetu, što se postiže kroz autentično izučavanje islama u perspektivi savremenog nepristranog i znanstveno objektivnog mišljenja i znanosti. Navedeno se nastoji ostvariti upoznavanjem studenata s temeljnim izvorima islama i njihovim povijesnim realiziranjima u muslimanskoj misli i praksi, posebno uvažavajući vjerske i kulturološke posebnosti balkanskih prostora.

Svojom historijskom pozadinom iskazanom i u arhitektonskom rješenju zgrade, Fakultet islamskih nauka predstavlja simbol susretanja i međusobnih prožimanja kultura dvaju svjetova, evropskog i islamskog. Otuda se na njemu teži proučavanju znanja koja su ugrađena u islamsku, kao i u zapadnu civilizaciju, u humanističke i društvene znanosti, što je u funkciji misije humanizma i boljeg razumijevanja među religijama i kulturama.

### Šta poslije završetka studija?

Prije svega, važno je istaći da se diploma Fakulteta islamskih nauka u Sarajevu priznaje i na najprestižnijim univerzitetima u svijetu i da omogućava našim svršenicima nastavak obrazovanja.

Do danas diplomu Fakulteta na prvom ciklusu studija dobilo je 1.090 studenata i studentica, 95 studenata je magistriralo i odbranjeno je 39 doktorskih disertacija. Svršenici i svršenice Fakulteta u svojstvu vjerskih službenika i službenica različitih profila kao i istaknutih kulturnih i javnih djelatnika danas su neodvojivi dio i aktivni kreatori bosanskohercegovačke zbilje.

S ponosom ističemo da naši svršenici obnašaju najodgovornije funkcije u Islamskoj zajednici (reisul-ulema, muftije, profesori i nastavnici, glavni imami, imami, muallimi i muallime), ali su istovremeno i na brojnim upravljačkim i rukovodećim pozicijama u društvu. Veliki broj naših svršenika rade kao imami, hatibi i muallimi izvan Bosne i Hercegovine te kao vjeroučitelji u više zemalja Zapadne Evrope.

Kontinuirano se radi na povećanju kompetencija svršenika i svršenica Fakulteta, ali i na osiguravanju novih radnih mjesta unutar i izvan Islamske zajednice u Bosni i Hercegovini.





## FAKULTET SPORTA I TJELESNOG ODGOJA

Patriotske lige br. 41  
033 668-768  
dekanat@fasto.unsa.ba  
www.fasto.unsa.ba

### Zašto odabrati?

Svojom dugom tradicijom, orijentacijom ka izvrsnosti, zalaganjem nastavnog kadra i menadžmenta Fakultet sporta i tjelesnog odgoja nosi epitet lidera u oblasti sportske edukacije i naučnoistraživačkog rada u Bosni i Hercegovini.

Fakultet sporta i tjelesnog odgoja je skladno razvijen akademski kolektiv, po kadrovskim, materijalnim, programskim resursima i kvalitetima, vodeći je u ovoj oblasti u Bosni i Hercegovini i ne zaostaje za sličnim fakultetima u regiji. Fakultet provodi tri ciklusa obrazovanja na općem smjeru i smjeru menadžmenta u sportu koji im osiguravaju vrhunske kompetencije, te ispoljavanje upravljačkih sposobnosti, razvoj kreativnosti i natjecateljskog duha. Ovakva orijentacija omogućava mladim ljudima idealne pretpostavke ka razvoju u svestrane, kvalitetne i uravnotežene ličnosti, te šansu da postanu oni faktori društva koji će biti sposobni da zauzmu bitne pozicije u društvenom sistemu u kojem žive i koji trebaju izgraditi.

Garancija za ostvarenje ovako definirane misije su relativno mlad nastavni kadar, optimalna opremljenost i funkcionalnost 8.500 m<sup>2</sup> korisnog učioničkog, kabinetskog, dvoranskog, laboratorijskog, bibliotečkog i studentsko-restoranskog prostora.

Fakultet sporta i tjelesnog odgoja je institucija kojoj mladi ljudi mogu posvetiti svoju strast i vrijeme sa sigurnošću da je to izvanredan izbor za njihovu kvalitetnu i održajnu budućnost.

### Šta poslije završetka studija?

- Nakon završenog **I ciklusa studija općeg smjera** studenti stječu znanja i osposobljenost za vođenje i realizaciju nastavnog procesa sporta i tjelesnog odgoja u odgojno-obrazovnim institucijama osnovnog, srednjeg, i visokog obrazovanja i sportskim, sportsko-rekreativnim, turističko-rekreativnim, kineziterapeutskim i sigurnosnim aktivnostima.

- Nakon završenog **II ciklusa studija općeg smjera** studenti stječu znanja i za vođenje nastavnog procesa sporta i tjelesnog odgoja u obrazovnim institucijama. Studenti su osposobljeni za apliciranje i vođenje manjih istraživačkih, razvojnih i aplikativnih istraživanja u cilju unapređenja efikasnosti programa i sadržaja iz domene sporta i tjelesnog odgoja.

- Nakon završetka **I ciklusa studija menadžmenta u sportu** studenti stječu znanja, stručnu i osposobljenost za rad u području sportskog menadžmenta, sportskog marketinga, menadžmenta poslovnih funkcija sportskih organizacija, finansijskog menadžmenta u sportu, menadžmenta sportskih događaja i objekata, bezbjednosti na sportskim objektima, sportskog brendinga.

- Nakon završetka **II ciklusa studija menadžmenta u sportu** studenti stječu specifična, visokostručna teorijska, metodološka i aplikativna znanja i stručnu i profesionalnu osposobljenost za učestvovanje, razvijanje, vođenje i kontrolu projekata u okviru funkcija sportskog menadžmenta.



## FILOZOFSKI FAKULTET

Franje Račkog 1  
033 253-100; 033 667-873  
dekanat@ff.unsa.ba  
www.ff.unsa.ba

### Zašto odabrati?

Nastavno-naučni proces odvija se na osnovnim i kombiniranim studijskim programima koji mogu biti jednopredmetni i dvopredmetni. Studiranjem na ovoj nastavno-naučnoj ustanovi stječe se široko obrazovanje iz oblasti humanističkih i društvenih nauka i to: filozofije, sociologije, historije, historije umjetnosti, arheologije, pedagogije, psihologije, bosanskog, hrvatskog i srpskog jezika, književnosti naroda Bosne i Hercegovine, engleskog, njemačkog, arapskog, turskog, perzijskog, ruskog, francuskog, italijanskog, španskog, latinskog, grčkog jezika, komparativne književnosti i bibliotekarstva.

Studenti mogu proširiti svoja znanja slušanjem i polaganjem izbornih predmeta iz češkog i švedskog jezika, koji su definirani unutar studijskih programa, kao i iz slovenačkog, poljskog i japanskog jezika.

Osim njegove osnovne, edukativne djelatnosti, Filozofski fakultet je od svog osnivanja pa sve do danas bio i ostao mjesto intenzivnog naučnoistraživačkog rada i brojnih aktivnosti povezanih sa razvojem i promocijom filozofskih, socioloških i historijskih oblasti, kao i oblasti historije umjetnosti, te arheoloških, pedagoških, psiholoških, filoloških, lingvističkih oblasti, ali i primijenjene lingvistike, metodike nastave, književnohistorijskih i bibliotečkih nauka i naučnoistraživačkog rada iz tih područja.

### Šta poslije završetka studija?


Po završetku studija studenti su, zahvaljujući kompetencijama i vještinama koje se stekli na Fakultetu, osposobljeni za rad u srednjim i osnovnim školama, bibliotekama, muzejima, arhivima, institutima različite namjene, zavodima za zaštitu spomenika, dokumentacijskim centrima.

Također, kao stručni saradnici, mogu sudjelovati u radu predškolskih i školskih ustanova, ustanova koje se bave kulturom, izdavaštvom, medijima, zdravstvenom i socijalnom skrbi, u državnoj upravi, javnim i privatnim ustanovama. Studenti koji završe nastavnička usmjerenja mogu se zaposliti kao nastavnici u srednjim i osnovnim školama.

Studenti koji završe nenastavne studijske programe mogu polagati ispite iz pedagoškog obrazovanja i osposobiti se za rad u srednjoj i osnovnoj školi.

Diplomirani studenti Filozofskog fakulteta danas su priznati akademici, univerzitetski profesori, nastavnici u srednjim i osnovnim školama, stručnjaci u praksi, kulturni i javni radnici, umjetnici koji ostvaruju međunarodna priznanja, književnici, novinari i diplomate.





## KATOLIČKI BOGOSLOVNI FAKULTET

Josipa Stadlera 5  
033 533-516  
tajnistvo@kbf.unsa.ba  
www.kbf.unsa.ba

### Zašto odabrati?

Katolički bogoslovni fakultet je visokoškolska ustanova, koja organizira i izvodi sveučilišni integrirani filozofsko-teološki studij, koji traje pet godina (300 ECTS), a njegovim se završetkom postiže akademski stupanj magistra teologije.

Fakultet je zasnovan na temeljima najstarije organizirane visokoškolske ustanove u BiH, Vrhbosanske katoličke teologije, koju je 1890. utemeljio prvi vrhbosanski nadbiskup dr. Josip Stadler. Ova visokoškolska ustanova od svoga osnutka izvršavala je svoje poslanje odgoja i obrazovanja svećeničkih kandidata. Uz ovu zadaću, Katolički bogoslovni fakultet danas ima i zadaću formacije katoličkih laika koji nakon završenog studija preuzimaju svoj dio odgovornosti u Crkvi i društvu.

Fakultet vrši svoje poslanje širenja Božjega kraljevstva i naviještanju Radosne vijesti znanstvenim istraživanjem, sustavnim i cjelovitim izlaganjem kršćanske objave, unapređivanjem spoznaje njezine istine preko filozofsko-teoloških znanosti, razvojem kršćanske filozofske i teološke misli, unapređivanjem ekumenizma i razgovora sa svim kršćanima, promicanjem dijaloga s nekršćanima i onima koji ne vjeruju, sa svijetom i kulturom.

### Šta poslije završetka studija?

Studiranje na KBF-u omogućuje studentima stjecanje specifičnog obrazovanja širokoga spektra, osposobljavajući studente za djelovanje i doprinoseći izgradnji vlastite osobnosti kroz stjecanje znanja, vrijednosti i stavova koji omogućuju kvalitetniji pristup životu i cjelokupnoj stvarnosti.

Studij teologije osposobljava za svećenički i laički pastoralni rad, za kvalificirano naviještanje Kristove poruke. Magistru teologije pruža se mogućnost djelovanja u znanstvenoistraživačkom radu na području teologije, humanističkih i društvenih znanosti, u području vjerskoga odgoja i obrazovanja u crkvenim zajednicama, u školi, u predškolskim ustanovama, u sredstvima društvenoga priopćivanja, crkvenoj administraciji, u različitim oblicima pružanja duhovne pomoći, rada u misijskim zemljama itd.

Upisom studija na Katoličkom bogoslovnom fakultetu postaješ dio tog živog organizma koji raste i razvija se, nastojeći ostati vjeran svojoj dugoj i bogatoj tradiciji kao zalogu sigurne budućnosti. Gradimo zajedno na dobrim temeljima, u duhu kršćanske vjere i crkvenosti budimo odgovorni članovi društva koji kritički promišljaju, osposobljeno i mudro djeluju da bismo pridonijeli sveopćem dobru.





## PEDAGOŠKI FAKULTET

Skenderija 72  
033 214-607  
dekanatpf@pf.unsa.ba  
www.pf.unsa.ba

### Zašto odabrati?

Pedagoški fakultet u Sarajevu je najstarija visokoškolska institucija u Bosni i Hercegovini nakon Drugog svjetskog rata. Osnovan je 16. 1. 1946. godine.

Do 1969. godine imao je status više škole, a 1969. godine je transformiran u Pedagošku akademiju. Akademske 1999/2000. godine upisana je prva generacija studenata Pedagoške akademije u četverogodišnjem trajanju. Pedagoška akademija je transformirana u Pedagoški fakultet 27. 4. 2009. godine.

Pedagoški fakultet funkcionira kao visokoškolska ustanova u četverogodišnjem trajanju, u skladu sa savremenim odgojnim i obrazovnim tendencijama u svijetu, evropskim standardima u obrazovanju edukatora i razvojnim potrebama Bosne i Hercegovine, kao i njenim autohtonim kulturnim vrijednostima.

Do kraja akademske 2015/2016. godine na Pedagoškom fakultetu diplomiralo je 11.836 studenata.

Pedagoški fakultet pruža različite forme cjeloživotnog obrazovanja u području predškolskog odgoja, razredne nastave, kulture življenja i tehničkog odgoja, specijalne edukacije, rehabilitacije i inkluzije s ciljem unapređenja kvaliteta odgojno-obrazovnog rada u reformiranoj osnovnoj školi.

### Šta poslije završetka studija?

Završen stepen I ciklusa studija omogućuje uspješno djelovanje u procesu predškolskog odgoja, razredne nastave, kulture življenja i tehničkog odgoja sa informatikom i edukacije i rehabilitacije na temelju stečenih kompetencija koje obuhvataju:

- osposobljavanje za zadovoljavanje savremenih potreba predškolskog odgoja, razredne nastave, inkluzivnih procesa, kulture življenja, tehničkog odgoja i informatike i međuovisnosti različitih faza odgojnog procesa,
- poznavanje razvojnih karakteristika polaznika ranog odgoja i obrazovanja,
- razumijevanje razvojnih karakteristika učenika u razrednoj nastavi,
- razumijevanje i poznavanje odgojno-obrazovnog procesa u razrednoj nastavi,
- zadovoljavanje savremenih potreba i međuovisnosti različitih faza obrazovnog procesa u području kulture življenja, tehničkog odgoja i informatike,
- prezentiranje savremenih tokova u nastavnom procesu kulture življenja, tehničkog odgoja i informatike,
- osposobljavanje za razumijevanje potreba individualiziranja i diferenciranja programa rada sa djecom sa teškoćama u razvoju,
- razumije uloge, odgovornosti i kompetencije svakog člana tima uključenog u rad sa djecom sa teškoćama u razvoju,
- poznaje tipičan kognitivni, socijalni, emotivni i fizički razvoj djece i prepoznaje odstupanja od tipičnog razvoja.





## ARHITEKTONSKI FAKULTET

Patriotske lige 30  
033 213-493  
arhitektura@af.unsa.ba  
www.af.unsa.ba

### Zašto odabrati?

Arhitektonski fakultet je od svog utemeljenja (1949. godine) uspostavio čvrstu edukacionu nit sa renomiranim srednjoevropskim arhitektonskim školama, ali je i kroz deкаде djelovanja postao prepoznatljivim i prema transponiranju autohtonih vrijednosti bosanskohercegovačkog graditeljstva u savremeni arhitektonski izraz. Iz tradicije ove škole, koja je senzitivni amalgam inženjerskih i umjetničkih disciplina, proistekao je „sarajevski arhitektonski krug“, popunjavan generacijama vrsnih neimara i pasioniranih sljedbenika progresivne graditeljske misli.

Proteklih godina promijenila se struktura nastavnog kadra i transformirao se nastavni plan i program, ali su zadržani prepoznatljivi profili i kompetencije studenata. Ostvarena je kvalitetna interaktivna saradnja sa renomiranim evropskim arhitektonskim centrima, uključujući fakultete iz Barcelone, Stuttgarta, Trondheima, Istanbula, Barija..., pri čemu je uspostavljena mobilnost studenata i nastavnog osoblja.

U okviru mobilnosti studenti na inozemnim partnerskim institucijama iskazuju zavidne rezultate, čime na najbolji način prezentiraju naučni i stručni kvalitet sarajevske arhitekture.

Ovaj fakultet bi trebali odabrati kandidati koji su posvećeni i vrijedni, ali i oni koji žele otkriti u sebi crtu kreativnosti i talenta.

### Šta poslije završetka studija?

Nakon završetka 1. ciklusa studija stječu se kvalifikacije za upis 2. ciklusa studija, kao i kompetencije za pristup tržištu rada u oblastima i nivoima saradničkih poslova na području arhitektonske i urbanističke djelatnosti.

Usvojena znanja i profesionalne kvalifikacije na 2. ciklusu vode ka zvanju magistra (diplomiranog inženjera) arhitekture, čime se omogućava upis 3. ciklusa studija, kao i odgovorno bavljenje svim stručnim poslovima u okviru djelatnosti. Kurikulumi se kontinuirano profiliraju i nadograđuju u skladu sa tržišnim potrebama i u najvećoj mjeri su kompatibilni sa evropskim edukacijskim prostorom.

Završetkom 2. ciklusa studija otvara se lepeza konkretnih djelatnosti u privatnom i javnom području, pri čemu su kandidati osposobljeni za rad u:

- projektantskim i urbanističkim biroima i zavodima,
- građevinskim preduzećima i konsalting agencijama,
- srednjim i visokim obrazovnim institucijama i naučnoistraživačkim zavodima i
- različitim institucijama i kompanijama iz područja arhitekture i urbanizma.

S obzirom na znatne potrebe tržišta rada u Bosni i Hercegovini ali i u inozemstvu, evidentan je kontinuirani interes mladih ljudi za ovom profesijom.





## ELEKTROTEHNIČKI FAKULTET

Zmaja od Bosne b.b., Kampus Univerziteta u Sarajevu

033 250-700

etf@etf.unsa.ba

www.etf.unsa.ba

### Zašto odabrati?

Elektrotehnički fakultet Univerziteta u Sarajevu predstavlja najstariju i najveću visokoškolsku ustanovu u Bosni i Hercegovini, koja školuje kadrove iz različitih oblasti elektrotehnike i računarstva: u oblasti automatike i elektronike, elektroenergetike, računarstva i informatike, telekomunikacija. Studij na Elektrotehničkom fakultetu u Sarajevu odvija se u tri ciklusa (bachelor, master, doktorski studij), po programima usklađenim sa programima sličnih visokoškolskih ustanova u Evropi.

Od 2012. godine su studijski programi 1. ciklusa na Elektrotehničkom fakultetu u Sarajevu dobili međunarodni certifikat od akreditacijske agencije za studijske programe ASIIN iz Njemačke, čime ova akreditacijska agencija potvrđuje da su studijski programi 1. ciklusa iz oblasti iz automatike i elektronike, elektroenergetike, računarstva i informatike i telekomunikacija po svom sadržaju i načinu izvođenja u potpunosti podudarni sa normama visokog obrazovanja koje vrijede u Evropskoj uniji.

Studij na Elektrotehničkom fakultetu u Sarajevu treba upisati:

- zato što, umjesto obećanja, Elektrotehnički fakultet u Sarajevu kao garanciju nudi višedecenijsku tradiciju potvrđenu iskustvima brojnih generacija bivših studenata,
- zato što Elektrotehnički fakultet u Sarajevu predstavlja jedinu visokoškolsku ustanovu koja obrazuje kadrove iz oblasti elektrotehnike i

računarstva, sa međunarodno akreditiranim programima,

- zato što se stjecanjem diplome Elektrotehničkog fakulteta u Sarajevu otvaraju nebrojene prilike za posao i nastavak obrazovanja u Bosni i Hercegovini, Evropi i svijetu.

### Šta poslije završetka studija?

Jedna od osnovnih prednosti studija na Elektrotehničkom fakultetu u Sarajevu u odnosu na druge visokoškolske ustanove je permanentna potražnja za stručnjacima iz oblasti elektrotehnike, računarstva i telekomunikacija.

To potvrđuju i podaci sa biroa za zapošljavanje, gdje se stručnjaci sa diplomom Elektrotehničkog fakulteta u Sarajevu u pravilu zadržavaju vrlo kratko, samo do pronalaska prvog posla. Svakako, veliki broj studenata svoje zaposlenje pronađe čak i prije formalnog završetka studija.

Svake godine određeni broj studenata odlučuje da svoje obrazovanje nastavi na prestižnim svjetskim univerzitetima u Njemačkoj, Austriji, Japanu i drugim razvijenim zemljama i pritom im budu priznati svi krediti prikupljeni tokom studija na Elektrotehničkom fakultetu u Sarajevu.





## FAKULTET ZA SAOBRAĆAJ I KOMUNIKACIJE

Zmaja od Bosne br. 8, Kampus Univerziteta u Sarajevu

033 565-211

[info@fsk.unsa.ba](mailto:info@fsk.unsa.ba)

[www.fsk.unsa.ba](http://www.fsk.unsa.ba)

### Zašto odabrati?

Fakultet za saobraćaj i komunikacije počeo je sa radom 1977. godine i u proteklih 40 godina postojanja stekao status vodeće obrazovne i naučne institucije u oblastima saobraćajno-transportnog inženjerstva i informaciono-komunikacijskih tehnologija. Obrazovni proces realizira se shodno bolonjskim principima u okviru dva odsjeka i šest usmjerenja. Nastavni planovi i programi na sva tri ciklusa studija po sistemu 3+2+3 permanentno se dograđuju i inoviraju u cilju praćenja zahtjeva i potreba savremenog saobraćajno-komunikacijskog sistema.

Proces edukacije koncipiran je tako da studenti, osim teorijskih, stječu i praktična znanja u okviru laboratorijskih vježbi, terenskih istraživanja i obavezne stručne prakse. Studenti starijih godina imaju mogućnost sudjelovanja u izradi istraživačkih i razvojnih projekata, kao i međunarodnih programa od strateškog interesa za Bosnu i Hercegovinu.

Fakultet za saobraćaj i komunikacije preduzima i podržava sve akcije u cilju osiguranja prohodnosti nastavnika i studenata na državnom i internacionalnom nivou, uspostavljanja regionalne saradnje i uključivanja u evropske obrazovne i naučnoistraživačke procese. Istovremeno se gradi i unapređuje unutrašnja organizacija sa posebnom brigom za studentski standard, ugodan radni ambijent i adekvatnu opremu za efikasno izvođenje nastavno-naučnog procesa.

### Šta poslije završetka studija?

Svršeni studenti Fakulteta za saobraćaj i komunikacije stječu, adekvatno završenom ciklusu studija, jedno od sljedećih zvanja: bachelor inženjer saobraćaja i komunikacija, magistar saobraćaja i komunikacija – diplomirani inženjer saobraćaja i komunikacija, PhD – doktor tehničkih nauka.

Zahvaljujući izrazitoj interdisciplinarnosti studijskih programa, naši kadrovi su profilirani za veoma širok dijapazon djelatnosti koji uključuje saobraćajno-transportno inženjerstvo i informaciono-komunikacijske sisteme u domenu upravljanja, tehnološkog planiranja i projektiranja, organizacije i ekonomike. Naši svršeni studenti su prihvaćeni u mnogim zemljama svijeta, a mnogi su izgradili zapažene karijere i pokrenuli uspješan biznis.

Mogućnosti za radno angažiranje u Bosni i Hercegovini i zemljama okruženja također su brojne u javnim i privatnim kompanijama, u institucijama izvršne i zakonodavne vlasti na svim nivoima, kao i u istraživačkim, projektantskim i obrazovnim institucijama.

Svršeni studenti Fakulteta za saobraćaj i komunikacije ne zadržavaju se dugo na zavodu za zapošljavanje, a značajan broj naših studenata pronalazi zaposlenje čak i prije odbrane završnog rada na II ciklusu studija, što pokazuje potražnju za ovim profilom stručnjaka na tržištu radne snage.





## GRAĐEVINSKI FAKULTET

Patriotske lige 30  
033 278-400  
gfsa@gf.unsa.ba  
www.gf.unsa.ba

### Zašto odabrati?

Na Građevinskom fakultetu organiziraju se dva bachelor-studija – studij građevinarstva i studij geodezije, koji traju tri godine i vrijede 180 ETCS. Nakon završetka prvog ciklusa studija organiziraju se četiri dvogodišnja master-studija sa 120 ETCS: „Konstrukcije“, „Hidrotehnika i okolišno inženjerstvo“, „Saobraćajnice“ i „Geodezija i geoinformatika“.

Planovi i programi svih studija usklađeni su sa planovima i programima prestižnih evropskih univerziteta, tako da studenti bez problema mogu dio studija ili kompletan master-studij pohađati na drugim univerzitetima u Evropi.

Osnovna motivacija za upis na Građevinski fakultet je mogućnost brzog zaposlenja nakon završetka Fakulteta u Bosni i Hercegovini ili u inozemstvu.

Diplome Građevinskog fakulteta Univerziteta u Sarajevu se priznaju u svim zemljama svijeta.

Na evidencijama nezaposlenih praktično nema inženjera koji su stekli diplomu na Građevinskom fakultetu u Sarajevu. Pošto svaki vid ekonomskog razvoja započinje izgradnjom objekata, perspektiva ovog zanimanja ne može doći u pitanje.

### Šta poslije završetka studija?

Nakon završenog studija građevinski i geodetski inženjeri imaju širok izbor zanimanja kojima se mogu baviti i sva su tražena i u BiH i u inozemstvu: projektiranje i izvođenje infrastrukturnih, proizvodnih, poslovnih, inženjerskih, stambenih i drugih objekata, upravljanje vodama, zaštita okoliša, istraživanje i proizvodnja građevinskih materijala, upravljanje građevinskim preduzećima, naučnoistraživački rad u oblastima građevinarstva, odnosno geodezije i geoinformatike, te razni administrativni poslovi u javnim i privatnim ustanovama i preduzećima.

Poslovi kojima se bave građevinski inženjeri su specifični po tome što se uvijek susreću sa novim problemima, a proizvodi njihovog rada su objekti koji svojim trajanjem nadilaze ljudski vijek i praktično definiraju okolinu u kojoj ljudi žive.

Upisivanjem i završetkom studija na Građevinskom fakultetu Univerziteta u Sarajevu otvarate brojne opcije za razvoj uspješne karijere baveći se izuzetno interesantnim poslom.





## MAŠINSKI FAKULTET

Vilsonovo šetalište 9

033 729-800

studentska\_sluzba@mef.unsa.ba

www.mef.unsa.ba

### Zašto odabrati?

Mašinski fakultet, kroz dinamičan i interdisciplinarnan nastavni program, nastoji svojim studentima pružiti kvalitetno obrazovanje, zanimljive istraživačke programe i saradnju sa inozemnim univerzitetima, institutima i privrednim subjektima.

Zbog veoma složene strukture naučne oblasti mašinstva, studij na Mašinskom fakultetu se odvija kroz smjerove, u sklopu kojih se tokom učenja postepeno uvode specifične istraživačke discipline. Prvi ciklus studija osposobljava studente za timski i samostalan rad u struci, ali i daje potrebna fundamentalna i stručna znanja za daljnji nastavak studija. Nakon završenih zajedničkih osnova u trajanju od dvije godine, studenti se mogu opredijeliti za studij na sljedećim odsjecima:

- Odsjek za mašinski proizvodni inženjering
  - smjer mašinski proizvodni inženjering
- Odsjek za industrijsko inženjerstvo i menadžment
  - smjer industrijsko inženjerstvo i menadžment
- Odsjek za energetiku, procesnu tehniku i okolinsko inženjerstvo;
  - smjer energetika
  - smjer procesno inženjerstvo
- Odsjek za tehnologiju drveta
  - smjer tehnologija drveta
- Odsjek za motore i vozila
  - smjer motori i vozila
- Odsjek za odbrambene tehnologije
  - smjer odbrambenih tehnologija
- Odsjek za mašinske konstrukcije
  - smjer mašinske konstrukcije

### Šta poslije završetka studija?

Nakon prvog ciklusa studija (3 godine) stječe se stručno zvanje bakalaureata – inženjera mašinstva uz naznaku smjera.

Završetkom I ciklusa studija stječu se:

- znanja o osnovnim naučnim i matematskim

principima potrebnim mašinskim inženjerima svih usmjerenja,

- sposobnost osnovne inženjerske analize s primjenom stečenih znanja u smislu identifikacije, analize, formulacije i rješavanja inženjerskih problema,
- sposobnost inženjerskog dizajna komponenata mašina na način razumijevanja metodologije dizajna i CAD-alata,
- sposobnost istraživanja literature, izbora prikladnih eksperimentalnih metoda i njihovog izvođenja, kao i prikupljanje i obrada podataka uz izvođenje zaključaka,
- osnovna iskustva iz inženjerske prakse sa sposobnosti izbora i upotrebe opreme, alata i metoda, kombinirajući teoriju i praksu za rješenje inženjerskog problema.

Nakon drugog ciklusa studija (2 godine) stječe se zvanje magistra mašinstva – diplomiranog inženjera mašinstva uz naznaku smjera.

Završetkom studija mašinstva stječu se znanja i vještine potrebne za rad na:

- projektiranju sistema logistike i različitih tehnoloških procesa, automatizacije, robotizacije i proizvodnje;
- oblasti dizajna, održavanja i tehnologija integracije municije;
- području energetike, procesne tehnike, KGH i okolinskog inženjerstva;
- projektiranju, kontroli tehnoloških procesa i kvalitete za sve vrste drvenih proizvoda;
- konstrukciji motora SUS, energetskih procesa u SUS-motorima i eksploatacija motora i motornih vozila;
- detaljnoj statičkoj i dinamičkoj analizi i sintezi mehaničkih konstrukcija, primjene računara u konstruiranju i metodama proračuna.

Za daljnje usavršavanje Mašinski fakultet nudi pohađanje trećeg ciklusa, nakon kojeg se stječe naučno zvanje doktora tehničkih nauka iz oblasti mašinstva.





## POLJOPRIVREDNO-PREHRAMBENI FAKULTET

Zmaja od Bosne 8

033 667-429

podrska@ppf.unsa.ba

www.ppf.unsa.ba

### Zašto odabrati?

Poljoprivredno-prehrambeni fakultet posjeduje ugled i tradiciju. Najstarija je visokoškolska ustanova u BiH, osnovana 21. marta 1940. godine, na kojoj je do danas diplomiralo preko 5300 inženjera poljoprivrede i prehrambene tehnologije i više od 600 studenata je steklo diplome bakalaureata.

Svim nastavnicima Poljoprivredno-prehrambenog fakulteta u fokusu aktivnosti je student kojem prenose svoja znanja, podstiču njegove radne navike i pružaju mogućnost stjecanja kvalitetnog obrazovanja.

Osim teoretskih, studentu se pruža mogućnost stjecanja praktičnih znanja iz različitih oblasti poljoprivredne proizvodnje i prehrambene tehnologije uz primjenu najviših akademskih i profesionalnih standarda. Praktična znanja stječu se u brojnim savremeno opremljenim laboratorijama, na vlastitom oglednom polju kao i u različitim poslovnim subjektima iz oblasti agrara.

Fakultet nudi studijske programe iz oblasti *biljne proizvodnje, zootehnike, prehrambene tehnologije i ekonomike poljoprivrede i prehrambene industrije*, koji su u skladu sa potrebama poslodavaca i tržištem rada. Odabirom jednog od ponuđenih studijskih programa student se školuje za proizvodnju ili preradu hrane, što je jedno od najplemenitijih zanimanja današnjice.

### Šta poslije završetka studija?

Poslije završetka studija studenti će imati temeljna znanja iz oblasti smjera koji su izabrali i raspolagat će vještinama:

- razumijevanja principa i procesa povezanih sa biljnom poljoprivrednom proizvodnjom, zootehnikom, prehrambenom tehnologijom ili ekonomikom poljoprivrede i prehrambene industrije,
- bit će osposobljeni da primijene stečena znanja u identifikaciji i rješavanju inženjerskih problema,
- osposobljeni da organiziraju biljnu i animalnu proizvodnju, te preradu biljnih i animalnih sirovina vodeći računa o zaštiti okoliša.

Nakon uspješnog završetka studija studentu se pruža mogućnost zapošljavanja u naučnoistraživačkim institutima i zavodima, ministarstvima, prehrambenoj industriji različitih profila (mesna, mliječna, proizvodnja alkoholnih i bezalkoholnih pića, konditorska, pekarstvo i dr.), srednjim stručnim školama, savjetodavnim službama, poljoprivrednim apotekama, nevladinim organizacijama.

Završetkom studija na Poljoprivredno-prehrambenom fakultetu student je također osposobljen za rukovođenje proizvodnjom na poljoprivrednim gazdinstvima (sa ograničenom ili potpunom odgovornošću, zavisno od stepena završenog studija), te je osposobljenost za pokretanje vlastitog biznisa.





## PRIRODNO-MATEMATIČKI FAKULTET

Zmaja od Bosne 33-35

033 723-723

[pmf@pmf.unsa.ba](mailto:pmf@pmf.unsa.ba)

[www.pmf.unsa.ba](http://www.pmf.unsa.ba)

### Zašto odabrati?

**Prirodno-matematički fakultet** je najviša naučno-nastavna ustanova u oblasti temeljnih prirodnih, matematičkih i kompjuterskih nauka, koja objedinjuje nauke u čijem sastavu se nalaze naučno-nastavni odsjeci za biologiju, fiziku, geografiju, hemiju i matematiku. Danas je Prirodno-matematički fakultet respektabilna visokoškolska ustanova ne samo na Univerzitetu u Sarajevu već i u cijeloj Bosni i Hercegovini. Prirodno-matematičke oblasti i nauke su matične na brojnim visokoškolskim organizacijama na Univerzitetu u Sarajevu, kao i drugim fakultetima širom Bosne i Hercegovine.

Kroz trogodišnji i četverogodišnji dodiplomski studij studenti stječu fundamentalna znanja iz biohemije i fiziologije, ekoloških nauka, oblasti genetike i mikrobiologije (na Odsjeku za biologiju), primijenjene matematike, teorijskih kompjuterskih nauka i informatike (na Odsjeku za matematiku), regionalnog i prostornog planiranja, turizma i zaštite životne sredine (na Odsjeku za geografiju), teorijske, eksperimentalne te medicinske radijacione fizike (na Odsjeku za fiziku) te hemijskih nauka i kontrole kvaliteta i zaštite okoliša (na Odsjeku za hemiju). Na svim odsjecima realizira se nastavno-naučni proces na nastavničkom smjeru na kojem se obrazuju budući nastavnici i profesori za rad u osnovnim i srednjim školama.

### Šta poslije završetka studija?

Po završetku studija studenti su, zahvaljujući kompetencijama i vještinama koje se stekli na Fakultetu, osposobljeni za rad u srednjim i osnovnim školama, naučnoistraživačkim institutima, stručnim laboratorijama u državnim službama, softverskim kompanijama i institucijama u finansijskom i IT-sektoru. Također, velike mogućnosti zapošljavanja su u hemijskim laboratorijama različitih profila i namjena, zatim u različitim granama hemijske industrije kao i u farmaceutskoj industriji, metalurgiji, petrohemiji, te u medicinskim ustanovama. Studenti koji završe Prirodno-matematički fakultet također mogu raditi i kao sudski vještaci, restoratori umjetnina i forenzičari.

Znanja stečena na dodiplomskom studiju omogućavaju i rad u oblastima turizma (zavodi, instituti, ministarstva i agencije), zaštite životne sredine/okoliša, te velikog broja institucija koje se bave regionalnim i prostornim planiranjem na svim nivoima. Kontinuitet obrazovanja prema bolonjskim principima na Prirodno-matematičkom fakultetu na svim odsjecima ostvaruje se kroz jednogodišnji i dvogodišnji studij na drugom ciklusu (II) i trogodišnji (doktorski studij) na trećem (III) ciklusu koji kroz studijske planove i programe omogućavaju visokokvalitetno stručno i naučno usavršavanje u oblastima studijskih smjerova sa dodiplomskih studija.





## ŠUMARSKI FAKULTET

Zagrebačka br. 20  
033 812-490  
info@sfsa.unsa.ba  
www.sfsa.unsa.ba

### Zašto odabrati?

Šumarski fakultet predstavlja jednu od najstarijih članica Univerziteta u Sarajevu. Osnovan je 1948. godine, te pripada Grupaciji biotehničkih nauka.

Edukacija studenata, u skladu sa bolonjskim principima, odvija se na odsjecima *Šumarstvo i Hortikultura*. Studiranje je ciklično strukturirano:

- I ciklus – studijski programi *Šumarstvo i Hortikultura* (3 godine/180 ECTS bodova),
- II ciklus – studijski programi *Održivo upravljanje šumskim ekosistemima i Pejzažna arhitektura* (2 godine/120 ECTS bodova),
- III ciklus – doktorski programi iz oblasti šumarskih i hortikulturnih nauka (3 godine/180 ECTS bodova).

Realizatori nastavnog procesa su istaknuti nastavnici i renomirani eksperti iz oblasti šumarstva i hortikulture. Dinamični studij realizira se kroz teoretsku nastavu, praktične auditorne i laboratorijske vježbe te terensku nastavu.

Praktična jednodnevna i višednevna terenska nastava, koja se realizira na svim godinama studija radom u šumskim ekosistemima ili šumarskim preduzećima, predstavlja bitnu odrednicu studija za stjecanje kompetencija i vještina u cilju osposobljavanja studenata za obavljanje svakodnevnih radnih zadataka u oblasti šumarstva i hortikulture.

### Šta poslije završetka studija?

Nakon završenog studija studenti su sposobni:

- nakon I ciklusa realizirati jednostavne zadatke i planirati mjere u području šumarstva i hortikulture uz stručni nadzor,
- nakon II ciklusa samostalno i timski raditi na zadacima kompleksnog planiranja, realizaciji i kontroli gospodarenja šumama te u oblasti urbanog zelenila i pejzažne arhitekture,
- nakon III ciklusa samostalno dizajnirati i realizirati originalna istraživanja u području šumarstva i hortikulture.

Nakon završenog studija na Šumarskom fakultetu mogućnosti zapošljavanja ogledaju se: u javnim preduzećima (šumarskim i za uređenje gradskih zelenih površina), općinskim, kantonalnim i federalnim šumarskim upravama, rasadnicima za proizvodnju sadnog materijala, nacionalnim parkovima, u projektantskim preduzećima, a najbolji imaju priliku zaposlenja na Šumarskom fakultetu.





## AKADEMIJA LIKOVNIH UMJETNOSTI

Obala Maka Dizdara 3  
033 210-369  
alu@alu.unsa.ba  
www.alu.unsa.ba

### Zašto odabrati?

#### **Akademija likovnih umjetnosti u Sarajevu**

je visokoškolska ustanova sa najdužom tradicijom u BiH koja pruža obrazovanje i osposobljavanje na području likovnih umjetnosti. Pored primarne, odgojno-obrazovne djelatnosti, na Akademiji se tokom četrdesetpetogodišnjeg postojanja realizirao niz značajnih kulturno-umjetničkih programa i manifestacija, izložbi i predavanja. Akademija je organizirala i učestvovala u brojnim umjetničkim i naučnoistraživačkim projektima, doprinoseći bosanskohercegovačkoj kulturnoj i umjetničkoj stvarnosti.

U nastojanju da se zadovolje evropski kriteriji umjetničke naobrazbe, naglasak je na permanentnom inoviranju i obogaćenju nastavnih planova i programa u duhu savremenog društvenog razvoja i razvoja umjetnosti te trendova u visokom obrazovanju.

Nastava se odvija na šest odsjeka: nastavnički, slikarstvo, kiparstvo, grafika, grafički dizajn, produkt-dizajn, a studentima se nude i različite grupacije izbornih predmeta. Prostorni kapaciteti Akademije – učionice, laboratorije, ateljei, radionice, galerija, biblioteka, prostor multimedije – omogućavaju kvalitetnu nastavnu i umjetničku djelatnost.


Mnogi umjetnici i dizajneri, odškolorani na Akademiji, postali su glavni akteri bh. umjetničke scene, stekli svjetski priznate nagrade za umjetnička ostvarenja i doprinijeli ugledu ove institucije.

### Šta poslije završetka studija?

Nakon završenog studija studenti su osposobljeni za djelovanje na širokom polju umjetničkog rada i/ili dizajna. Uz temeljne kompetencije, studenti su osposobljeni za samostalni umjetnički rad i za djelovanje na polju pedagoškog i umjetničkog rada, te za rad na različitim projektima produkt i grafičkog dizajna.

Spremni su, uz posjedovanje stvaralačkog potencijala, uključujući kritičko mišljenje, da svoje znanje primijene u širokom spektru poslova povezanih sa likovnom umjetnosti, dizajnom, digitalno-vizuelnim oblikovanjem sa višestrukom namjenom, te stječu vještine komuniciranja, prezentiranja i timskog rada. Kompetencije se proširuju u skladu sa položenim izbornim predmetima.





## AKADEMIJA SCENSKIH UMJETNOSTI

Obala Kulina bana 11  
033 215-277  
asu@asu.unsa.ba  
www.asu.unsa.ba

### Zašto odabrati?

Zbog toga što je naša škola najstarija i najuspješnija institucija ove vrste u Bosni i Hercegovini.

Zbog kvaliteta dokazanog u praksi, jer su naši profesori, bivši i sadašnji studenti osvojili više od 200 relevantnih nagrada u oblasti teatra, televizije i filma.

Upisom na našu školu vi učite i postajete dio izuzetno uspješnog kolektiva.

Zato što se osnovna saznanja o struci stječu kroz visok obim praktičnog rada.

Zato što smo mi multimedijalna akademija, jer smatramo da su gluma, režija/AV usmjerenje (kamera, montaža i snimanje te dizajn zvuka), produkcija i dramaturgija jedno, ali da se manifestiraju kroz različite medije.

### Šta poslije završetka studija?

Vi ste po završetku studija na multimedijalnoj akademiji osposobljeni da radite u svim medijima: teatru, televiziji, radiju, filmu, ali i najrazličitijim medijskim oblicima koji se razvijaju na web platformi. Biti u skladu sa zahtjevima vremena, osposobljeni za rad na više polja, velika je prednost.

Nakon studija izlazite pripremljeni za okolnosti profesionalne prakse kod nas, regionalno i u svijetu, jer su nastavni programi bazirani na praktičnom radu, a provode se u timskoj sinergiji studenata svih odsjeka.

Završetkom našeg studija postajete sudionik arene globalno i stalno rastuće industrije medija, scenskih i audiovizuelnih umjetnosti.





GRUPACIJA  
UMJETNOSTI

## MUZIČKA AKADEMIJA

Josipa Stadlera 1/II  
033 444-896  
studentska@mas.unsa.ba  
www.mas.unsa.ba

### Zašto odabrati?

Muzička akademija Univerziteta u Sarajevu je ustanova visokog zanimanja za muziku u svim oblastima. Misija Akademije je da educira visokokvalitetne, sposobne, kreativne i međunarodno kompetitivne i kompetentne kadrove u pedagoškim, umjetničkim i naučnim oblastima.

Nastavni planovi i programi bolonjskog studija na Muzičkoj akademiji su doslovno evropski jer su kreirani prema sličnim kurikulumima evropskih akademija.

Od umjetničkih događaja koje je pokrenula Muzička akademija u posljednjih deset godina su: *Majske muzičke svečanosti*, *Sarajevo Chamber Music Festival*, *Koncertna sezona MAS*, *Sarajevo Sonic Studio*.

Značaj ovih manifestacija je nemjerljiv za razvoj Akademije ali i kulturne sredine grada Sarajeva i Bosne i Hercegovine.

Muzička nauka danas na Muzičkoj akademiji je u znaku snažnog razvoja zahvaljujući prvenstveno Institutu za muzikologiju koji okuplja sve nastavnike i studente iz različitih oblasti muzičke nauke.

Danas je Muzička akademija međunarodno prepoznatljiva umjetnička i obrazovna institucija s razvijenim odsjecima i smjerovima, ciklusima studija, izraženim umjetničkim i naučnim aktivnostima i rezultatima.

### Šta poslije završetka studija?

Završavajući studij na Muzičkoj akademiji u Sarajevu, mladi muzičari imaju šansu postati umjetnička i intelektualna elita koja će svojim pedagoškim i javnim djelovanjem utjecati na razvoj kulture i umjetnosti za dobrobit cijele društvene zajednice.





# NAUČNI INSTITUTI





# Institut za istraživanje zločina protiv čovječnosti i međunarodnog prava

Halida Nazečića br. 4  
033 561-350  
info@institut-genocid.unsa.ba  
www.institut-genocid.unsa.ba

## Djelatnost Instituta

Istraživanje i eksperimentalni razvoj u društvenim i humanističkim naukama. Institut za istraživanje zločina protiv čovječnosti i međunarodnog prava Univerziteta u Sarajevu je javna naučna ustanova koja radi na poslovima koji imaju neprocjenjivu vrijednost za naučno istraživanje agresije, genocida i drugih oblika zločina protiv čovječnosti i međunarodnog prava na području Bosne i Hercegovine. Kao meritorna i priznata naučnoistraživačka ustanova, Institut prezentira rezultate istraživanja, informirajući svjetsku naučnu i političku javnost o agresiji i genocidu.

Sistematsko naučno i stručno pribavljanje dokumenata o zločinima protiv čovječnosti i međunarodnog prava omogućuje stvaranje dokumentacione osnove za serioznije elaboriranje svih oblika zločina u Republici Bosni i Hercegovini i izradu naučnih i stručnih ekspertiza. Na taj način vrši se sistematsko unapređenje naučnog rada iz oblasti istraživanja zločina protiv čovječnosti i međunarodnog prava. Usto, razrađuju se i usavršavaju naučni i stručni postupci evidentiranja, prikupljanja, klasificiranja, unosa, analize i obrade prikupljenih podataka. Brojni stručni i naučni kadar iz Bosne i Hercegovine i inozemstva koji radi na istraživanjima iz ovih oblasti dobiva adekvatnu pomoć od Instituta ili se najdirektnije upućuje na realizaciju pojedinih projekata.

## Biblioteka i arhiva

Institut posjeduje biblioteku sa svim svojim izdanjima od svog osnivanja kao i drugim značajnim knjigama o tematici kojom se Institut bavi.

Institut posjeduje arhivu opremljenu na savremeni način, u kojoj je smještena bogata arhivska građa Instituta. Arhivska prostorija je opremljena savremenijom opremom.





# Institut za historiju

Alipašina 9  
033 217-263  
institut.za.historiju@iis.unsa.ba  
www.iis.unsa.ba

## Misija

Institut za historiju je vodeća naučna ustanova u oblasti historiografije u Bosni i Hercegovini, specijalizirana za proučavanje prvenstveno historije Bosne i Hercegovine od ranog srednjeg vijeka do najnovijih dana. Osim istraživanja historije naše zemlje, misija Instituta je da svojim projektima postane mjesto razmjene ideja historičara ne samo sa Balkana nego i mjesto susreta i saradnje historičara iz raznih dijelova svijeta. Osim unapređenja znanja o sveukupnosti povijesnih događanja u vlastitoj zemlji, Institut za historiju ima misiju postati istraživačko središte koje će otvarati mogućnosti za približavanje raznih historiografskih škola i mjesto susreta historičara sa Istoka i Zapada, jednako kao što je Bosna i Hercegovina tokom čitave svoje povijesti bila mjesto susreta raznih civilizacija. Misija Instituta je i afirmacija kritičkog pogleda na povijest.

## Ciljevi

Institut teži zadržati visoke naučne standarde, bez bilo kakvog vannaučnog utjecaja na naučne projekte i rezultate naučnih istraživanja. U tom smislu Institut uspostavlja partnerske odnose sa sličnim institutima u Evropi i svijetu, s ciljem da naučna znanja u svijetu postanu dio naše historijske nauke, ali istodobno je cilj da naša istraživanja postanu dostupna svetskoj stručnoj javnosti. Svoje ciljeve Institut realizira kroz naučne projekte i izdavačku djelatnost, te organizacijom naučnih konferencija, okruglih stolova, seminara, naučnih i stručnih sastanaka iz oblasti historije.





# Orijentalni institut

Zmaja od Bosne br. 8-b.  
033 225-353  
ois@bih.net.ba  
www.ois.unsa.ba



## Zadaci

- prikuplja, sređuje, obrađuje i publicira orijentalnu rukopisnu i arhivsku građu i izvore za historiju Bosne i Hercegovine,
- proučava arapski, turski i perzijski jezik i njihove književnosti i kulture, te ispituje njihove elemente u bosanskom jeziku i kulturi,
- proučava kulturnu baštinu Bošnjaka na orijentalnim jezicima,
- u okviru osmanistike proučava probleme društvene, političke, ekonomske i kulturne historije Bosne i Hercegovine u doba osmanske uprave,
- proučava orijentalnu umjetnost, prvenstveno na području Bosne i Hercegovine,
- radi na usavršavanju naučnog i stručnog kadra u oblasti orijentalistike,
- saraduje sa srodnim ustanovama i organizacijama, kao i pojedinim naučnim radnicima u zemlji i inozemstvu,
- objavljuje rezultate svog naučnoistraživačkog i stručnog rada i čini ih dostupnim javnosti putem svojih publikacija: časopisa *Prilozi za orijentalnu filologiju* i edicija *Posebna izdanja i Monumenta Turcica Historiam Slavorum Meridionalium Illustrantia*.

Orijentalni institut u Sarajevu je smješten u krugu Kampusu Univerziteta.  
Stradanje Orijentalnog instituta u agresiji na

Bosnu i Hercegovinu (1992–1995)  
Prije agresije na Bosnu i Hercegovinu Orijentalni institut posjedovao je tri fonda: Rukopisnu zbirku, Arhiv i Biblioteku.  
Prije agresije na Bosnu i Hercegovinu Orijentalni institut posjedovao je tri fonda: Rukopisnu zbirku, Arhiv i Biblioteku.

**Rukopisna zbirka** posjedovala je 5263 kodeksa manuskripta na arapskom, turskom i perzijskom jeziku. Arhiv je posjedovao više zbirki. Zbirku *Manuscripta turcica* činilo je 7156 dokumenata iz perioda od 16. do 19. stoljeća – fermana, berata, bujuruldija bosanskih valija, sudskih rješenja, izvoda iz sumarnih deftera, raznih izvještaja, finansijskih isprava i drugih dokumenata na osnovu kojih je bilo moguće izučavati mnoga pitanja iz raznih oblasti, zbirku 66 *sidžila*, odnosno protokola mjesnih sudova, kao prvorazrednih izvora za proučavanje lokalne historije pojedinih krajeva i mjesta, sačinjavalo je 66 *sidžila* ili njihovih fragmenata iz perioda od 17. do 19. stoljeća, *Vilajetski arhiv* sa oko 200.000 dokumenata, zbirku *tapija* – dokumenata o posjedovanju zemljišta na području svih kadiluka u Bosni i Hercegovini u drugoj polovini 19. stoljeća, te zbirku fotokopija i mikrofilmova građe iz drugih arhiva i ustanova iz zemlje i inozemstva. Biblioteka je posjedovala preko 10.000 naslova, odnosno preko 15.000 knjiga jer su mnogi od njih bili objavljeni u više tomova.






# Institut za genetičko inženjerstvo i biotehnologiju

Zmaja od Bosne 8 Kampus  
033 220-926  
ingeb@ingeb.unsa.ba  
www.ingeb.unsa.ba

Institut za genetičko inženjerstvo i biotehnologiju (INGEB), kao organizaciona jedinica Univerziteta u Sarajevu, važna je njegova komponenta naučne i edukativne funkcije. Naša misija je razvoj novih genetičkih tehnologija koristeći najsavremenije naučne metode koje su primjenjive u različitim granama industrije, od poljoprivredne i prehrambeno-tehnološke do zdravstva i farmaceutske industrije, kao i zaštite bioloških resursa. INGEB sa svojih šest laboratorija raspolaže infrastrukturom za savremena molekularno-biološka istraživanja na polju biljne, animalne, mikrobne i humane genetike i genomike istovremeno pružajući šansu studentima I i II ciklusa fakulteta prirodno-matematičkih, biotehničkih i biomedicinskih nauka sudjelovanja kroz program „Studentski istraživački projekti“. Kompetitivna naučna sredina izvrsno je mjesto za mlade i perspektivne studente III ciklusa iz pripadajuće oblasti s mogućnošću kontinuirane razmjene naučnih informacija u okvirima vrsne međunarodne saradnje, kao i kroz praktičnu laboratorijsku realizaciju doktorskih disertacija.

Bazična i aplikativna genetika i biotehnologija zajedno sa informacionim tehnologijama osnova je savremenog naučnog i tehnološkog napretka čovječanstva. Praktična znanja i vještine iz molekularne genetike i biologije koje studenti steknu kroz aktivnosti INGEB-a profiliraju ih i osposobljavaju za istraživački i laboratorijski rad u akademskom ili industrijskom sektoru bilo gdje u BiH i

svijetu. Nakon studiranja se otvaraju mogućnosti sudjelovanja u postdoktorskim istraživanjima u okviru INGEB-a, kao i stručno osposobljavanje i usavršavanje.





## Institut za jezik

Hasana Kikića 12  
033 200-117  
institutzajezik@izj.unsa.ba  
www.izj.unsa.ba

Institut za jezik Univerziteta u Sarajevu pridružena je članica Univerziteta. Institut je osnovan 1972. godine i od tada kontinuirano radi na razvoju i širenju jezičke kulture, sistematskom naučnom istraživanju i razvoju jezika i jezičkih formi na načelima naučne izvrsnosti, kao i objavljivanju rezultata rada uz stalnu edukaciju kadrova za

potrebe nauke. U okviru toga prioritet su naučna, fundamentalna aplikativna i razvojna istraživanja predstandardnog i književnog jezika (kao i organskih idioma), proučavanje jezika i jezičkih izraza u Bosni i Hercegovini, historije jezika i narodnih govora, pri čemu se koriste i uvažavaju svjetski lingvistički kriteriji.





UNIVERZITETSKI  
CENTRI  
BIBLIOTEKE  
DRUŠTVA





## Univerzitetski tele-informatički centar UTIC

Zmaja od Bosne 8 (objekat 33)  
033 560-240  
support@utic.unsa.ba  
www.utic.unsa.ba

Univerzitetski tele-informatički centar (UTIC) je podorganizaciona jedinica Univerziteta čija djelatnost objedinjuje potrebe za aplikativno-informatičkom podrškom organizacionim jedinicama Univerziteta s ciljem integriranja edukacionih i poslovnih funkcija organizacionih jedinica te povezivanja njihovih računarskih resursa u jedinstvenu akademsku mrežu i servise. UTIC vrši neciklično obrazovanje osoblja Univerziteta iz informacionih tehnologija, a obavlja i ostale djelatnosti koje su u službi njegovih ciljeva i osnovnih djelatnosti i koje pridonose boljem iskorištavanju ljudskih i prostornih kapaciteta i opreme, te stručne poslove za potrebe Univerziteta. Neke od aktivnosti koje UTIC obavlja su:

- **uvezivanje članica u računarsku mrežu Univerziteta u Sarajevu:** akademska računarska mreža Univerziteta u Sarajevu je kreirana sa namjerom postavljanja informaciono-komunikacione infrastrukture kojom se povezuju fakulteti i institucije Univerziteta u jedinstvenu računarsku mrežu kojom se upravlja sa centralnog čvorišta formiranog u Univerzitetskom tele-informatičkom centru (UTIC). Na serverima lociranim u UTIC-u uspostavljene su mrežne usluge koje koriste studenti i akademsko osoblje svih fakulteta;
- **održavanje i razvoj informacionog sistema studentskih službi (ISSS UNSA):** ISSS predstavlja web bazirani informacioni sistem koji arhivira sve podatke o profesorima, studentima,


ispitnim rokovima, ostvarenim rezultatima na ispitima i mnogo drugog. ISSS je implementiran i koristi se aktivno na svim fakultetima/akademijama Univerziteta i pridruženim članicama. Osnovna funkcija sistema je informatizacija i automatizacija osnovnih procesa fakulteta i akademija koji se tiču nastave, ispita, ocjenjivanja, evidencije, izdavanja uvjerenja itd., te obezbjeđenja provođenja bolonjskog načina i principa studiranja;



**WEB HOSTING**  
domains & websites



## Univerzitetski tele-informatički centar UTIC



- **izdavanje i štampanje diploma i dodatka diplomi studenata svih fakulteta/akademija:** aplikacijom za štampanje diplome i dodatka diplomi Univerzitetski tele-informatički centar (UTIC) obavlja sve tehničke i administrativne aktivnosti potrebne za izdavanje i štampanje diploma i dodatka diplomi studenata Univerziteta u Sarajevu;
- **informatizacija svih osnovnih i srednjih škola Kantona Sarajevo (EMIS)** (engl. *Education Management Information System*) je informacioni sistem namijenjen prikupljanju i upravljanju podacima u osnovnim i srednjim školama. Sistem omogućava prikazivanje statističkih podataka u procesu obrazovanja na nivou osnovnih i srednjih škola, te služi kao pomoć u planiranju na nivou ministarstava i škola;
- **administriranje i održavanje državnog domenskog prostora .ba Bosne i Hercegovine:** UTIC je ovlaštenu administrator državnog .ba domena. U sklopu navedene aktivnosti, UTIC vrši uspostavu računarsko-komunikacione infrastrukture, izradu naprednih tehničkih rješenja, izgradnju odgovarajućih informacionih rješenja, uspostavu jedinstvenog DNS servisa, kao i tehničku i administrativnu podršku na nivou Bosne i Hercegovine.





# Centar za interdisciplinarnе studije (CIS)

Zmaja od Bosne br. 8  
033 668-685  
coordination@cis.unsa.ba  
www.cis.unsa.ba

## Zašto odabrati?

Centar za interdisciplinarnе studije (CIS) je usmjeren ka interdisciplinarnom obrazovanju nove generacije stručnjaka/inja iz Bosne i Hercegovine kao i iz zemalja regije jugoistočne Evrope. Kao takav, CIS okuplja više od stotinu uvažениh domaćih i stranih eksperata iz različitih naučnih oblasti koji zajednički rade na projektima razvoja iz svih naučnih oblasti. CIS predstavlja inkubator za interdisciplinarnе programe na Univerzitetu u Sarajevu.

Ciljevi:

- razvoj domaćih potencijala i preduvjeta za utemeljenje demokratije i vladavine prava, kao i ubrzanje procesa evropskih integracija u Bosni i Hercegovini i regionu jugoistočne Evrope;
- interdisciplinarno obrazovanje mlade generacije stručnjaka/inja za akademske i profesionalne pozicije, od domaće „think tank” baze, profesionalne javne administracije, do novog političkog vodstva kompatibilnog s principima demokratije, evropskim političkim i ekonomskim integracijama;
- doprinos procesu reforme obrazovanja u Bosni i Hercegovini kroz implementaciju studija drugog i trećeg ciklusa baziranih na principima evropskog prostora visokog obrazovanja i evropskog prostora istraživanja;
- razvoj različitih interdisciplinarnih i multidisciplinarnih programa

cjeloživotnog učenja, kao dodatno i specijalističko obrazovanje koje će doprinijeti boljoj poziciji polaznika na tržištu rada.


## Šta poslje završetka studija?

Stanje na tržištu rada, prioritet euroatlantskih integracija BiH i potreba adekvatnijim integracijama obrazovnog sistema Kantona Sarajevo u evropski sistem visokog obrazovanja i naučnoistraživačkog rada opravdavaju postojanje interdisciplinarnih studija i obrazovanje profila koji se bave ključnim temama integracije u EU, poboljšanja promocije i implementacije zaštite ljudskih prava itd.

Interdisciplinarni studiji su namijenjeni osobama koje zanimaju različiti pristupi rješavanju problema sa kojima se sreću u svom poslovnom okruženju, te kombiniranje više nauka u jednom programu. Na globalnom tržištu rada postoji naglašena i rastuća potreba za ovim kadrovima, koji su specijalisti u više disciplina.







## Nacionalna i univerzitetska biblioteka BiH

Zmaja od Bosne 8b, Univerzitetski kampus  
033 275-300  
katalog@nub.ba, ured.direktora@nub.ba  
www.nub.ba

Pravo na korištenje građe i usluga NUBBiH-a imaju sva zainteresirana fizička i pravna lica upisom u Biblioteku.

Članovi NUBBiH-a mogu koristiti vlastite knjige, različitu bibliotečku građu iz fonda Biblioteke kao i referentnu građu (enciklopedije, rječnike).

Kao osnovni informacijski instrumenti u NUBBiH-u, na raspolaganju su različite vrste kataloga (predmetni, abecedni i **online katalog/COBISS.BH**).

Knjige se posuđuju izvan Biblioteke (lektire, beletristika), a stručna literatura se koristi u Biblioteci.

Korisnicima usluga na raspolaganju su **tri opće čitaonice** sa oko 100 čitalačkih mjesta.


U NUBBiH-u egzistira i **Austrijska biblioteka** sa 10 radnih mjesta gdje je građa isključivo na njemačkom jeziku i **Egipatska čitaonica** na arapskom jeziku.

Pored ovih čitaonica, otvorena je **čitaonica za naučne radnike** namijenjena magistrantima, doktorantima, profesorima te ostalim naučnim radnicima.

Korisnik koji treba građu (knjigu, fotokopiju, digitalizirani videozapis i sl.) iz drugih biblioteka u BiH ili iz inozemstva može je naručiti u **Službi međubibliotečke pozajmice**.

S ciljem pružanja pomoći korisnicima u pronalaženju naučnih informacija, na zahtjev korisnika u Biblioteci se obavljaju tematska pretraživanja raspoloživih **svjetskih baza podataka** i pronalaze informacije relevantne za naučnu oblast kojom se korisnik bavi.

Bitno je napomenuti da se u NUBBiH-u nalazi i **Odjeljenje specijalnih zbirki** i **Odjeljenje stare periodike** sa svojim bogatim kolekcijama.





## Gazi Husrev-begova biblioteka

Gazi Husrev-begova 46  
033 264-960  
info@ghb.ba  
www.ghb.ba

Gazi Husrev-begova biblioteka u Sarajevu je najstarija biblioteka u Bosni i Hercegovini. Osnovana je 1537. godine i već 480 godina kontinuirano radi prvo kao školska a kasnije kao samostalna javna biblioteka. Posjeduje oko stotinu hiljada bibliotečkih jedinica (rukopisa, štampanih knjiga, časopisa i različitih dokumenata) na arapskom, turskom, perzijskom, bosanskom i još nekim evropskim jezicima.

Od toga više od 10.500 bibliotečkih čine kodeksi rukopisa sa oko 20.000 većih i manjih djela iz islamskih nauka, orijentalnih jezika, lijepe književnosti, filozofije, logike, historije, medicine, veterine, matematike, astronomije i drugih nauka.

Osim rukopisa, biblioteka posjeduje važnu kolekciju novina i časopisa koji su izlazili na prostoru Bosne i Hercegovine posljednjih 150 godina, arhivsku građu nastalu na našim prostorima te značajnu kolekciju monografskih publikacija iz kulturne historije Bosne i Hercegovine, književnosti, filozofije, logike, historije i drugih tema.

Biblioteka čitateljstvu stavlja na raspolaganje dvije čitaonice, studentsku i istraživačku. Namjena studentske čitaonice je prvenstveno da omogući optimalne uvjete za učenje dok je istraživačka čitaonica prilagođena istraživačima koji se koriste digitalnom građom biblioteke.





## Akademijski kulturni centar Univerziteta u Sarajevu (AKCUS)

Mehmeda Spahe 20  
033 442-958  
akcus@bih.net.ba, info@seljo.org  
www.seljo.org

„Seljo“ je osnovan 1949. godine kao članica Univerziteta u Sarajevu kako bi se studentima omogućilo iskazivanje talenata u oblasti kulturnog i umjetničkog amaterizma i do sada se afirmirao vrijednim i nesvakidašnjim umjetničkim rezultatima koji prevazilaze okvire standardnih amaterskih interesiranja i postignuća.

Od osnutka pa do danas u „Selji“ je djelovalo više od 17000 članova radeći u raznim ansablama i sekcijama.

Brojni su poznati operski umjetnici, dirigenti, majstori plesa i narodnih igara i pjesama, priznati književnici, afirmirani dramski umjetnici, ugledni muzičari i likovni umjetnici, naučni i estradni radnici koji su počinjali svoje karijere u „Selji“.

Trenutno je aktivno slijedećih četrnaest ansambala i sekcija:

Akademijski ansambl narodnih igara i pjesama „Seljo“

Narodni orkestar „Seljo“

Akademijsko pozorište „ART Club“

Vokalna grupa tradicionalne muzike „Seljo“

Likovni atelje „Seljo“

Akademijski mješoviti hor „Seljo“

Kamerni hor

Vokalni ansambl „Prijatelji“

Tamburaški orkestar „Seljo“

Mladi tamburaški orkestar

Vokalni ansambl „Corona“

Narodni orkestar „Bentbaša“

Plesni ansambl „Elenes“

Ansambl gitara „Seljo“

Zemlje u kojima su ansambl gostovali (neki samostalno, neki zajedno, negdje samo jednom, a negdje i više puta) su: SAD, Kina, Njemačka, Italija, Turska, Norveška, Albanija, Francuska, Poljska, Grčka, Makedonija, Slovenija, Srbija, Hrvatska, Crna Gora, Azerbejdžan, Bugarska, Švedska, Austrija, Španija, UK, Alžir, Tunis, Irak, Libija i dr.

Potrebno je samo se prijaviti i biti redovan/a na probama. Umjetnički voditelji su tu zbog vas, a nikakva članarina nije obavezna, potrebno je imati spreman pasoš!







## Univerzitetsko sportsko društvo "Bosna"

Hamze Hume broj 2  
033 553-330  
usdbosna@usdbosna.unsa.ba

Univerzitetsko sportsko društvo „Bosna“ je osnovano 7. decembra 1947. godine kao sportsko društvo studenata Univerziteta u Sarajevu s ciljem promocije i brige o studentskom sportu.

Društvo je utemeljeno na principima sporta i tjelesnog odgoja kao univerzalnih kategorija, saglasno Međunarodnoj povelji fizičkog odgoja i sporta UNESCO-a i principima međunarodnog olimpijskog pokreta.

U USD „Bosna“ su udruženi klubovi: atletski, dizača tegova, fudbalski, gimnastički, hokej, hrvачki, džudo, džiju-džicu, karate, klizačko-koturaljski, košarkaški, odbojkaški, plivački, ronilački, ritmičke gimnastike, rukometni, stonoteniski, šahovski, teniski i vaterpolo.

Svi klubovi su otvoreni za prijem novih članova, a zajednička manifestacija svih klubova USD „Bosna“ je proljetni i jesenji kros „studenata“.





# SLOBODNO VRIJEME



## O Sarajevu

Izvor: <http://sarajevo.co.ba/o-sarajevu/>

U davna vremena osnova ga čuveni Isa-beg Ishaković na mjestu gdje je i sada. Sarajevo je glavni i najveći grad Bosne i Hercegovine. Pravcem istok – zapad, prateći rijeku Miljacku, prostire se od Bentbaše do Sarajevskog polja pa sve do Ilidže i Hrasnice. Po širini smješten je između Trebevića i Crepoljskog te Debelog brda i Huma.

Može se slobodno reći da je grad Sarajevo urbano, ekonomsko, administrativno, univerzitetsko i kulturno-umjetničko središte Bosne i Hercegovine.

Zahvaljujući bogatom duhovnom, historijskom i prirodnom izgledu, Sarajevo je daleko poznatije od nekih većih gradova svijeta. Broji oko 429.000 stanovnika.

### SARAJEVSKI ATENTAT

U Sarajevu su 1914. godine ubijeni austrougarski prestolonasljednik Franz Ferdinand i njegova supruga Sofija, što je bio povod za početak Prvog svjetskog rata.

### OLIMPIJADA

Sarajevo je i olimpijski grad. Te davne 1984. godine održane su 14. Zimske olimpijske igre koje su do tada bile najbolje organizirane. I danas se osjeća, posebno zimi, olimpijski duh grada.

### OPSADA SARAJEVA

Tokom devedesetih godina 20. vijeka ime grada Sarajeva je često bilo na naslovnica dnevnih novina u cijelome svijetu. Sarajevo je 1992. godine ušlo u najdužu opsadu tokom jednog od najkrvavijih ratova u novijoj evropskoj historiji. Grad Sarajevo je 1.479 dana bio pod stalnom opsadom.

### SARAJEVSKI TOPONIMI

Kroz grad protječe rijeka Miljacka, a u neposrednoj blizini grada je i izvorište rijeke Bosne, sa popularnim izletištem Sarajlija, Vrelom Bosne. Oko grada su olimpijske planine: Jahorina, Bjelašnica, Igman, Treskavica i

Trebević, koji su posebno tokom zimskih mjeseci omiljena izletišta Sarajlija i turista iz cijeloga svijeta.

### ARHITEKTURA

Urbanu sliku grada karakteriziraju brojni sakralni objekti, džamije iz osmanskog perioda, pravoslavne, katoličke i evangelističke crkve, sinagoga i drugi kulturno-historijski spomenici, ali i moderne arhitektonske građevine rađene po najnovijim standardima.

### OBRAZOVANJE

Grad Sarajevo sjedište je najveće visokoškolske ustanove u zemlji, Univerziteta u Sarajevu, te niza drugih visokoškolskih ustanova, čime se svrstava u red najvećih univerzitetskih centara u cijeloj regiji jugoistočne Evrope.

### KULTURA

Uz nekoliko nacionalnih i gradskih pozorišnih kuća, muzeja i kulturnih institucija, Sarajevo je i važno mjesto na kulturnoj mapi ovog dijela evropskog kontinenta. Svake je godine grad na rijeci Miljacki domaćin niza kulturnih festivala međunarodnog karaktera, među kojima su najznačajniji: SFF – Sarajevo film festival, Sarajevo JazzFest, ljetni kulturni festival „Baščaršijske noći“, teatarski festival novih produkcija „MESS“, „Sarajevska zima“, teatarski festival eksperimentalnih pozorišta „TeatarFest“, festival savremene poezije „Sarajevski dani poezije“, dječiji festival „Kid's Fest“.







## O Sarajevu

### SARAJEVO FILM FESTIVAL

August

Sarajevo film festival je najpoznatija filmska smotra u jugoistočnoj Evropi. Ovaj festival je osnovan u toku ratnih dešavanja, a danas je tradicionalna godišnja smotra najvećih rediteljskih i glumačkih imena svjetskog filma.

### SARAJEVSKA ZIMA

Pokrenut u godini kada su održane Zimske olimpijske igre u Sarajevu, Internacionalni festival Sarajevo „Sarajevska zima“ postao je tradicionalni susret umjetnika i građana svijeta. Četrdeset dana neprekidnih dešavanja – muzike, plesa, teatra, likovnih izložbi, promocija knjiga. Festival se održava svake godine u periodu od 7. do 21. marta.

### BAŠČARŠIJSKE NOĆI

1–31. jula

U julu se prostor parkinga uz Šeher-Ćehajinu ćupriju pretvara u atraktivnu umjetničku scenu na kojoj se svake noći smjenjuju akteri raznovrsnih kulturnih manifestacija: dramskih predstava, koncerata klasične ili rok muzike... Dio programa odvija se i na Baščaršijском trgu.

### MESS festival

oktobar

Internationalni teatarski festival „malih eksperimentalnih scena“, na kojem učestvuju teatri i moderne plesne grupe iz cijele Evrope. Djela se izvode na originalnom jeziku gostujućeg teatra.

### JAZZ FEST

oktobar

Internationalni muzički festival „Jazz Fest“ je muzički događaj koji je za relativno kratko vrijeme izgradio zavidan renome. Dani kada je u Sarajevu moguće čuti najbolju svjetsku džez-muziku, ali i umjetnike koji pripadaju novim pravcima.





## O Sarajevu

### VIJEĆNICA

Obala Kulina bana  
[www.vijecnica.ba](http://www.vijecnica.ba)

20. aprila 1896. godine otvorena je Gradska vijećnica u Sarajevu. Vijećnica se nalazi nedaleko od Baščaršije na Mustaj-pašinom mejdanu i predstavlja najljepši i najreprezentativniji objekat iz austrougarskog perioda građen u pseudomaurskom stilu. Interesantno je da je u ovom stilu rađena većina objekata koji su izgrađeni u Sarajevu za vrijeme austrougarske vlasti, pa možemo reći da je Gradska vijećnica sinonim za austrougarski period u Bosni i Hercegovini i zaštitni znak tog vremena.



Prvi projekat je uradio Karlo Paržik, koji se nije svidio tadašnjem ministru Benjaminu Kalaju, pa je izrada novog povjerena Alexandru Witteku. Kao uzor u izradi ovog projekta poslužila mu je džamija Kemala II, zbog čega je dva puta odlazio u Kairo. Kako je Wittek navodno, upravo zbog ovog projekta (nedovoljnog osvjetljenja u glavnoj auli zgrade), umno obolio i izvršio samoubistvo, završetak njegovog projekta je povjeren 1894. godine Ćirilu M. Ivekoviću. Uporedo sa izradom i razradom projekta tekla je i izgradnja objekta od 1892. do 1894. godine. Objekat Gradske vijećnice zvanično je predat na upotrebu 1896. godine.

Što se tiče njene funkcije, Vijećnica je prvobitno predstavljala zgradu tadašnje gradske uprave i gradske administracije Sarajeva. Nakon Drugog svjetskog rata sve do 1949. godine Vijećnica je služila gradskoj upravi, kao zgrada Okružnog suda Sarajeva i sjedište Bosanskohercegovačkog sabora. Nakon toga Vijećnica postaje Gradska biblioteka, odnosno Nacionalna i univerzitetska biblioteka BiH.

Za vrijeme agresije na Sarajevo 25/26. augusta 1992. godine zapaljena je zgrada Vijećnice, a u požaru je nestao Katalog Nacionalne i univerzitetske biblioteke Bosne i Hercegovine, oko 80% knjižnog fonda i dokumenata koji svjedoče o historiji BiH. Danas je Vijećnica obnovljena i može se posjetiti. Cijena ulaznice za studente iznosi 3 KM.





## Muzeji

U Sarajevu djeluje 20 važnih muzeja čije postavke pričaju o zanimljivoj historiji Sarajeva i bogatoj kulturi naroda koji ovdje žive. O dugoj naseljenosti ovih prostora svjedoče ostaci neolitske butmirske civilizacije, tragovi Ilira, Romana, Slavena. Najstarije tragove života na području BiH možete naći u Brusa Bezistanu, te Zemaljskom i Historijskom muzeju.

### BRUSA BEZISTAN

Abadžiluk 10

Radno vrijeme: od ponedjeljka do petka  
10:00–18:00; subota: 10:00–15:00


U prostoru Brusa bezistana – natkrivenog bazara iz 16. stoljeća - smješten je depadans Muzeja Sarajeva, gdje se nalazi stalna postavka „Od prahistorije do kraja austrougarskog perioda“. Između ostalog, u ovom muzeju izloženi su nakit i ostaci грнčarije sa arheoloških neolitskih nalazišta Butmir i Debelo brdo, a dio eksponata sa ovih lokacija pohranjen je i u Zemaljskom muzeju.

### ZEMALJSKI MUZEJ

Zmaja od Bosne 3

Radno vrijeme: utorak – petak: 10:00 – 19:00,  
subota – nedjelja: 10:00–14:00

Bosanski stećci krasi prostor ispred ulaza u najznačajniju muzejsku instituciju u BiH, Zemaljski muzej, u kojem se nalaze i predmeti sa dvora kraljevske dinastije Kotromanić, čuvena Sarajevska hagada, te oko 4 miliona drugih eksponata, koji svjedoče o bogatom kulturnom i prirodnom naslijeđu BiH.



### HISTORIJSKI MUZEJ

Zmaja od Bosne 5

Radno vrijeme: ponedjeljak – nedjelja: 09:00 – 22:00

Historijski muzej BiH kroz arhivsku građu, dokumente, fotografije i razne predmete tretira kompletnu historiju Bosne i Hercegovine, od prvog spominjanja imena Bosna (949. godine), pa sve do savremenog doba.







## Društveni život

Sarajevo nije samo grad studiranja, kulture i dr. već u ovom gradu možete uživati u dnevnim i noćnim izlascima.

Danas u svako doba dana možete naći savršeni kutak za užitek, a većina ugostiteljskih objekata radi dokasno u noć.

Tražite li kvalitetan noćni provod, znajte da Sarajevo nudi brojne opcije za večernji izlazak. U mnogim klubovima svakodnevno nastupaju cover bendovi, dok posjetioci brojnih restorana imaju priliku svjedočiti nastupima interpretatora tradicionalnih pjesama i sevdalinki.



### GDJE MOŽETE JESTI

Ukoliko preferirate domaću ili međunarodnu kuhinju Sarajevo je idealno odredište za ljubitelje dobrog zalogaja. Sarajevo je poznato po brojnim mjestima gdje možete uživati u gastronomskim specijalitetima.

Bosanska kuhinja mješavina je orijentalne, mediteranske i centralnoevropske kulinarske tradicije, a za pripremu jela uglavnom se koriste meso i povrće.

Tradicionalni bosanski "fast food" restorani su aščinice u stilu kafeterija, buregdžinice, gdje se služe pite (jufke punjene raznim sastojcima) i ćevabdžinice, u kojima možete uživati u ćevapčićima i ostalom mesu prženom na grillu.



UNIVERZITET  
U SARAJEVU  
OBALA KULINA BANA 7/II  
71000 SARAJEVO  
BOSNA I HERCEGOVINA  
[www.unsa.ba](http://www.unsa.ba)













UNIVERZITET U SARAJEVU